

# JEREMÍAS

## Israel itan Judá jonibo jakonmaitian jato eseti Jeremías kenaa

### Jeremías janbix yoikaata

**1** <sup>1</sup>Hilcíasnín bake Jeremíasnín  
yoia joibo, itan jan aká jawékibo.  
Jeremías iki, ja Benjamín jonibaon main  
iká, Anatot jemamea ikon sacerdote-  
baon rarebo.

<sup>2</sup>Ibonra Jeremías yoia iki, ja Amón-  
man bake Josías, chonka kimisha bari-  
tia Judáin apo inontian.

<sup>3</sup>Jainxonra yoiribia iki, ja Josíasnín  
bake Joacim, Judáin apo inontian,  
itan ja Josíasnín bake Sedequías,  
chonka westíora baritia pichika oxo  
kaman Judáin apo inontian. Ja iki  
ja Jerusalénhainoa jonibo yatanxon  
wetsanko jato bokanontian.

### Jeremías Ibon kenaa

<sup>4</sup>Eara Ibon yoia iki:

<sup>5</sup>“En mia joniamatianbira, en mia  
katota iki; mia pikotamatianbira,  
nokona inon ixon en mia onantiaa iki;  
maibotiibi iká jonibaon ikon profeta  
itira en mia imaa iki”, akin.

<sup>6</sup>Jatianra en yoia iki: “¡Jawe ireskiai-  
panon Ibó! ¡Eara bakeranonyora ikax  
yoyo iti onanma iki!” akin.

<sup>7</sup>Ikaxbira ea Ibon yoia iki:

“Eara bakeranonyora iki iamawe.  
En mia kati yoiainko kaxonra,  
en mia yoia joibo min jato yoiti  
jake.

<sup>8</sup>Tsokibi rakéyamawe,  
mia koirannira ea miibetan ikái.  
Ea, Ibonra, jaskara yoiái”, akin.

<sup>9</sup>Jatianra nokon kexa tii axon, ea Ibon  
yoia iki:

<sup>10</sup>“Nokon joira min kexain en akai.  
Ramara ja apobo, itan ja maibotiibi  
ikábo,  
jato yoiti koshiya en mia imai,  
mexaxon, min jato poxanon ixon,  
ras axon, min jato besheanon ixon,  
itanribi jakiribi apakeribaxon,  
min jato weninti kopí”, akin.

### Jeremíssen rabéakin namá keska meran oinna

<sup>11</sup>“Ibonra ea yokata iki:  
¿Jeremías jaweki min oinna?” akin.  
“Enra oinke Almendro jiwi pon-  
yan”, akinra en aká iki.

<sup>12</sup>“Jatianra ea yoia iki: Min yoiara  
ikon iki.

Jaskara ikenra, ja en yoia joibo  
senennon ixon en oinnai”, akin.

<sup>13</sup>Jawen rabé itínra Ibon ea yokata iki:  
“¿Jaweki min oinna?” akin.  
“Kentí kobinnaira en oinke,  
norteokeax tanxatax, moa chiko-  
tibi”, akinra en aká iki.

<sup>14</sup>Jatianra Ibon ea yoia iki:  
“Jatíbi nato main jaa jonibokira  
jan masá téneti jakonmabires nor-  
teokeax jatoki chikoti iki.

<sup>15</sup>Ea Ibonra, ikon yoiái,  
ja norteorikea  
jatíbi apobora en kenai.  
Ja apobaonra bexon,  
ja Jerusalén jikitiainbi  
jaton ani yakatibo akanti iki,  
jatíbi jan kateaketana makan chiké  
bebon,  
itan jatíbi Judáin iká jemabo  
bebonra ikanti iki.

- <sup>16</sup> Ja ea jenea ocharesbo jato masá tenematira koshi joi en pikoai, jabaonra incienso ininti, wetsa diosbores  
menoxonkana iki, itan ja rabiti jatonbi akábores rabikana iki.
- <sup>17</sup> Ikaxbi minbiribi, koshiakin shinanwe;  
katanwe, jatíbi ja ati en mia yoiabo jato yoitanwe.  
Jatoki rakéyamawe, mia jaskaketianra,  
jato bebonxon en mia saki imati iki.
- <sup>18</sup> Ramara koshiakin aká jema keská en mia imai,  
yami witá keská,  
bronze chiké keská,  
Judá mainmea jatíbiainoa jonibaon mia akaitian min jato kopínon ixon: jawen apobo, jawen joni koshibo, itan jawen sacerdotebo,  
jainoax jatíbi ja mainmea jonibora min jato ati iki.
- <sup>19</sup> Jabora miibetan reteanankanti iki, ikaxbira miaareskantima iki,  
jaskara ikenra mia koiranti kopí ea mibé iti iki,  
Ea, Ibonra jaskara ati en yoiái”, akinra ea aká iki.

#### Israelbo senenma iká

- 2** <sup>1</sup>Eara Ibon yoia iki:  
<sup>2</sup> “Jerusalén jonibo yoitanwe; jakonhakin ninkákanon ikax saí itanwe:  
‘Ibonra jaskara yoiái!  
Enra shinanai mato bake ranon inontian en yoia maton akonkin senenhakatiai,  
awinhakin jato biti keskáakin en mato biara maton ea noia iki, jatianra jain jawebi xoxoyamai mananman ninontian maton ea chibana iki,  
ja main banaara jawebi xoxoyamai’  
<sup>3</sup> Israelra nokonabiribi iti en imaa iki, nokon yoá kikin jakon en tsekaa keskára iká iki.

- Wetsanbires jato ramiaketianra en jato masá tenemaa iki,  
jakonmabires jan masá tenetira en jatoki raana iki.  
Ea, Ibonra onantiakin yoike”, akinra aká iki.
- <sup>4</sup> Jacobnin chiní bakebó, jatíbi Israelnin rarebobó, Ibon joi ninkakanwe.
- <sup>5</sup> Ibonra jato yoia iki:  
“¿Jawe jakonma eibakea nokoaxki, maton rekenbo eibakeax ochókana iki?  
Jawemabi diosbo rabikin peoaxa, jatonbinix jawemabi banékana iki.
- <sup>6</sup> Egiptonkonía en jato pikoa ikenbira,  
ea benati shinanyamakana iki, jain jawebi xoxoyamai mananmanra en jato boá iki,  
mai manxan itan ketóbiresa iká iki, jain onpax yama, kikin onsára iká iki,  
ja maira tsoabi jain jaama iká iki, jainra tsoabi winóyamaa iki.
- <sup>7</sup> Nato mai jakonhainra en jato bea iki,  
jainoa yoá jawékiakanon ixon, itan jaton aká kikin jakon yoábo jawékiakanti kopí.  
Ikaxbira bexon nokon mai jaskátima ikenbi maton mekeyamaa iki, jaskáaxonra nokona ikenbi ja maiiki maton ea kerásmaa iki.
- <sup>8</sup> Sacerdotebaonra ea benayamaa iki, jato esé onanmai nokon jonibaonra ea onankashamakana iki, joni koshibora eki yoitima a iki, jatianra profetabo ikonma dios Baalnin janenkores yoyo ikana iki, jatianra ja rabiti jatonbi aká jawemabi ikenbi jares rabikana iki”, akin.
- <sup>9</sup> Jaskara ikenra, Ibon yoia iki:  
“Ramara ja matoyabi maton bakebo, itan  
maton bababaon jakonma akábo yoixonkin en peoi.

- <sup>10</sup> Ja bari jikiaiori iká nasinkobo  
kaxon ointankanwe;  
jan akonkin ointi Cedarhain joni  
raankanwe,  
abanon ikonrin ixon oinkin,  
<sup>11</sup> ikon Dios onanma mainmea  
jonibaon jaton diosbo jenexon  
wetsa bikana.  
¡Jaton diosbo ikonmabo ikenbira  
wetsabo chibanyamakanai!  
Ikaxbira nokon jonibaon ea jenea  
iki,  
ea koshi ikenbi,  
ja rabiti akana jawemabi ikenbira  
ja chibankin ea jenekana iki.  
<sup>12</sup> ¡Jaskara iken, ratéwe, naiká!  
¡Kikinni raketi saki iwe!  
Ea, Ibonra, onantiankin yoiike”,  
akin.  
<sup>13</sup> “Nokon jonibora rabé rabeti  
ochakana iki:  
eara jenekana iki, jan jati onpax  
jokonai keská ikenbi,  
jaskáaxonra jain onpax ati jatonbi  
akana iki,  
jara pozo toeta ikax jain onpax  
banéyamai”.

**Senenma iká kopí  
Israelnin masá tenea**

- <sup>14</sup> Ibonra yoia iki: “Israel jonibora  
yanka yonokaataima iki;  
jabora yanka yonokanti pikotama  
iki  
Jaskara ikenki.  
¿Jaweati, maton rawibaon maton  
jawéki mato bichinnai?  
<sup>15</sup> ¿Jaweakiki jato akí,  
mato leónbo koshin keotai keskatai?  
Jaton maira jawebioma maton  
banémaa iki;  
jaton jemabora maton ketea iki,  
jatianra tsoabi jain moa banéyamaa  
iki.  
<sup>16</sup> Egiptonkonía Menfis betan Tafnes  
ikainoa  
sontárobaonra matoaresxon mato  
rabinhakana iki,

maxtanhai keskáakinra mato akana  
iki.

- <sup>17</sup> Ea jenea kopíra mato jaskara  
winota iki,  
ea maton Ibo Dios ixon,  
jaskati jati en mato onanmaa  
ikenbi.  
<sup>18</sup> Jatianra ramaki ¿Jawe jakon maton  
biai  
ja Egiptonko Nilo onpax xei  
kaxon?  
¿Jawe jakonki maton akai, Asiriain  
Éufrates onpax xei kaxon?  
<sup>19</sup> Maton jakonma akátoninbira, mato  
masá tenemati iki,  
ja ebé ixon ati senenhayamaa  
ixonra,  
maton masá teneti iki.  
Shinankanwe, jaskara jakonma,  
itan masá shinanti riki,  
eakaya maton Ibo Dios ikenbi,  
rabiamakin maton ea jenea, iki  
ixon mato oinnon.  
Ea jatíbi atipana Ibonra jaskara  
yoiike”, akin.

**Israel yoitimaa**

- <sup>20</sup> Ibonra yoia iki: “Mato eki yoiti-  
maara moa basi iki,  
eki yoiti itinra mato keenyamaa iki.  
Matonra ea yoia iki: ‘Mia tee axon-  
tininra ea keenyamai’.  
Jatíbi mató keyábotiibi,  
itan jatíbi jiwi ichashaman peia  
namanmeaxa mia teakaata iki.  
<sup>21</sup> Jakonshaman uva jiwi banai kes-  
káakin en mato akára,  
kikinbires jakon uva bero xoxo  
keska mato iká iki.  
¡Ikaxbira mato bebonbires jakonma  
ike,  
matorin ixonra moa en mato  
onanyamake!  
<sup>22</sup> Ikonbiresi mato lejanin chokitabi,  
itan jatíbi ja mato kenaiti jabónman  
mato ikábira,  
ebelon maton ochan kerás jareske.  
Ea, Ibonra, onantiakin yoiike.

- <sup>23</sup> ¿Jawekeskaxonki maton yoiti iki:  
 ‘Noara  
 ochaama iki, ikonma diosboribira  
 non rabiamaa iki ixon’?  
 Shinankanwe mai teshanpainxon  
 maton akáboki jawekeska iká iki,  
 jatíbi ja maton akábo shinankanwe,  
 matora camello awin jawen tae  
 chorishin jatíbiain ishtoi kawan-  
 tanai keská iká iki;
- <sup>24</sup> ináma burro awin jawen keen  
 shinan akáx nii meran kawatani  
 paxkinxon koshín joinhatanai kes-  
 kára mato iká iki.  
 Ja ikasaitianra tsonbi bechiteti  
 atipanyamake.  
 Jawen benen benaara paxkinyamai,  
 jatíbitianra ja ikasaitian ati iki.
- <sup>25</sup> ¡Israelbo, zapatooma ishtokin  
 maton tae ramiayamakanwe,  
 nomiira mato tetaraxnake!  
 Ikaxbira maton ea yoia iki:  
 ‘Ikáma, ikonma diosbo rabikin  
 jenetira atikomabires iki;  
 wetsabaon ikonma diosbora non  
 noike, nonra rabikin jeneyamai’,  
 akin.

**Atibi Israel masá tenemati**

- <sup>26</sup> Yometso merakana rabinnai kes-  
 katira,  
 Israel rabinti iki, apobo, joni  
 koshibo,  
 sacerdotebo, profetabo itan jatíbi  
 jonibora rabinkanti iki;
- <sup>27</sup> matonra jiwi yoiai: ‘Miara nokon  
 papa iki’, akin,  
 itan makanbiribi maton yoiai:  
 ‘Miara nokon tita iki’, akin.  
 Eki jakonmai yoyo ikinra, maton  
 ea ninkáyamaa iki,  
 Jaskara ikaxbira, onsá oinxon  
 maton ea yoiai:  
 ‘¡Noa akinniwe!’ iki.
- <sup>28</sup> Judá jonibó, ¿Ja matonbi aká  
 diosboki jawerano iki?  
 ¡Maton diosbora maton jematii  
 icharibi iki!

¡Jaskara iken jabo bebánon,  
 rabintibires jakonmain  
 mato pakéketianki mato akinti  
 atipana ixon non oinnon!

**Judá jonibaon atibi masá  
 teneti Diossen yoia**

- <sup>29</sup> ¿Jatíbi mato eki yoitima a ixonki,  
 jawe jakonma en aká maton ea  
 yoixonti iki?  
 Ea, Ibonra, onantiakin yoiike.
- <sup>30</sup> Yankabiresa maton bakebo retea-  
 nantian en jato mawámaa iki,  
 jaskákin en jato onanmakasabira  
 axeyamakana iki.  
 León siná keskabo ixonra, maton  
 profetabo matonbi retea iki.
- <sup>31</sup> Ramatian jaa jonibo ixon,  
 matonribi Ibon joi netékainxon  
 ninkákanwe:  
 Israelbo, ¿Matonaki ea, jain jawebi  
 xoxoyamai manan keska jain tsoa  
 jatima iká iki?,  
 ¿Ja mainki ota iká iki?  
 Nokon jonibó, ¿Jawe akiki mato  
 yoyo ikai:  
 Noara moa xabakaatabo iki; jawe-  
 tianbira mia non rabiwetsayamai  
 iki mato ikai?
- <sup>32</sup> ¿Ainboki benonontian saweni jawen  
 metsá  
 pené jakon, itan jan raotibaon  
 shinanbenoti iki?  
 Jaskara ikenbira, nokon jonibo,  
 ikonbiresi eon shinanbenokana iki.
- <sup>33</sup> ¡Matora jaskaxon joni  
 nokoti onanshaman iki!  
 ¡Matora jakonmanin axekanainko  
 jato axeai ainbo iki!
- <sup>34</sup> Jawebiomabaon itan jakonma  
 akamabaon  
 jimin akára maton chopá tishibires  
 iki,  
 ja jonibaon jakonma akaira jawe-  
 tianbi  
 rátereskin maton nokoama iki.
- <sup>35</sup> Ikaxbi jatíbi jaskara ikenbira maton  
 yoiai:

‘Nonra jakonma akáma iki.  
Diossa eki sinatama iki ixon’.  
Jaskara ikenra, noara ochaama iki  
ixon maton yoiboresaitian,  
jakonmaanoxon maton akábo en  
mato yoixonti iki.

<sup>36</sup> ¿Jaweatiki jaskara ati maton shina-  
nabo jenexon ishtonbires maton  
wetsa keska shinanna?

Asiriabaon mato akinyamani kes-  
káakinra, Egiptobaon mato akin-  
tima iki.

<sup>37</sup> Jatianra Egiptonkoniax kikinbiresi  
rabina mato jakiribi joti iki,  
jaskara ikenra ja mato jaki koshiai-  
baon ea keenyamaa iki,  
jatianra jabetan ixon jawekopíbi  
maton bitima iki”, akin.

#### Israelbo yoitima

**6** <sup>16</sup> Ibonra jawen jonibo yoia iki:  
“Baibotiibi chankáxon oinkanwe,  
yokákakanwe moatian jakátiai  
keskáki mato jati iki ixon,  
bebon jakon axonra;  
maton jakon nokoti iki”, akin;  
Ikaxbi jabora neskata iki:  
“Noara min yoia keskati jayamai”,  
iki.

<sup>17</sup> Jatianra Ibon, jato koiranti son-  
tárobo imaxon,  
jawen jonibo yoia iki:  
“Ja onsá ikai onanti en mato axona  
tsararan ikaitian ninkákanwe”,  
akinbo.

Ikaxbira jonibo neskata iki:  
“Yoiti itinra noa keenyamai”, ikibo.

<sup>18</sup> Jaskara ikenra Ibon yoia iki:  
“Maibotiibixon, ninkakanwe,  
jaskara nokon jonibo winoti kaai  
onankanwe.

<sup>19</sup> Ninkáwe, maiká:  
Enbira joniboki jakonma jawéki  
bemaí  
jakonmabires anoxon shinankana  
kopí;  
nokon joi jawebi ninkákashama-  
kana iken,

itan nokon esé omiskana kopí.

<sup>20</sup> ¿Jaweatiki Sabáino a incienso, itan  
ja ochó mainmea inín jiwibo maton  
ea bexonai?

Ja yoinabo retexon maton keyokin  
menoatoninra ea raroyamai,  
wetsa yoinabo maton ea retexo-  
naitoninribira ea keenyamai”,  
ikira iká iki.

<sup>21</sup> Jakopíra, Ibo neskata iki:  
“En amaara maton rawíbaon retea-  
nankin matoareskanti iki.  
Papabo itan bakebo, jato patax  
ikábo, itan jato  
jabé raenanaibora jatíbi mawákanti  
iki”, ikira iká iki.

#### Norteorixon peoxon Israelbo mai bichinkaskana

<sup>22</sup> Ibonra yoia iki:  
Ninkakanwe. “Kikinbires koshi  
sontárobo ora ochó mainmeax  
norteorikeax benox benxokaakanai.

<sup>23</sup> Jabora kanóti, itan espada tsomá-  
yabo moa ikanai;  
jabora jato ramiaibo iki, noibamis-  
mabo;  
ja koshín saí ikanara iká iki aniparo  
xoo ikai keská,  
jatianra kabáyonin peyakaaxbo  
bokanai.

Moa Jerusalén jonibo betan retea-  
nantiresa ikanai”, akin.

<sup>24</sup> Jatianra Jerusalén jonibo neská-  
kana iki:

“Nokira joi nokóke, jatianra  
kikinbiresi raketi noa koshi keyoke,  
noara onisi chexakatai  
ainbo bakeni ikai keskati.

<sup>25</sup> ¿Xabain boyamakanwe,  
bainkboribi niamakanwe!  
¡Non rawíbo moa amistires  
ikanai;  
jatíbiainra onsá iki!” ikibo.

<sup>26</sup> ¡Nokon jonibo chexakaati oniskin,  
xaxa chopá sawekanwe,  
chiimapon taramekaanwe,  
onísti chopá saweex

chexakaati winikanwe.

Jabicho min bake mawáketian ikai  
keskati;

jaskara ikenra jan noa keyotibo  
moa joti ochóma iki!

<sup>27</sup> Ibonra ea yoia iki: “Enra mia yoiai  
nokon

jonibo min jato tananon ixon. Jatón  
ikabo, kikinakin min jato onanti  
kopí”, akin.

<sup>28</sup> Ibó, jatíbi jonibora, kikinbires yoiti-  
mabo iki;

ja jonibora jatoki jansokin joi  
yoiaibo iki, itan jatón shinan moa  
ramitabo iki;

bebonbires ramitabo ikaxa, jabo  
bronze betan yami keska iki.

<sup>29</sup> Jan niwe xoon atin koshin,  
chii xoon akára plomo charatai.

Jakonma akaibo yamatiakin  
imakasi itira yankabires iki.

<sup>30</sup> Jaskara kopíra “plata tsimes”, akin,  
janekanti iki,  
jaskákinra mia, Ibon, min jato  
potaa iki.

#### **Jeremíasnin jainxon rabiti xobonkoxon joi yoia**

**7** <sup>1</sup> Jeremíassa Ibon yoia iki:

<sup>2</sup> “Nokon xobo xepikotinko  
chankáxon jato joi yoiwe: jatíbi Judá  
jonibo, jatíbi nato xepikotinko ea rabii  
weitaibo, nato joi ninkakanwe,

<sup>3</sup> ninkákanwe, jara jatíbi atipana Ibo,  
Israelnin Dios iki: ‘Matón tee akaibo  
itan matón ikábo benxoaboreskanwe,  
jatianra nato main en mato jamabo-  
resti iki.

<sup>4</sup> Parankin mato yoi neskataibo ikon-  
hayamakanwe: ¡Neno riki Ibon xobo,  
neno riki Ibon xobo! iki ikaibo.

<sup>5</sup> Itiki matón ikábo, itan matón tee  
akaibo mato jakoni, itan itikeskatibi  
jaton wetsabo betan mato ikí;

<sup>6</sup> jainoax wetsankoniax joa jonibo,  
kachianabo, benomaatabo moa jato  
ramiayamakin, itan jakonma akáma  
ikenbi nenonxon moa jato reteyamakin,

jainxon matonbinix jan ramíti wetsa  
diosbo moa rabikin jenekin,

<sup>7</sup> jatianra ja matón reken papabo jatí-  
bitian nato main janón ixon en jato  
meniainko, en mato jamaboresti iki.

<sup>8</sup> Ninkakanwe. Matora janso joiboki  
koshiai mato jawebi akinyamainbi.

<sup>9</sup> Matora yometsoai, retemisai, wano-  
yanixbi teamisai, ikonma ikenbira  
jansoi mato ikon riki ikai, matónra Baal  
inciensio ininti menoxonai, mato onan-  
nama diosbora matón rabiai,

<sup>10</sup> jaskara ikaxbira ea iboamakana  
xobonko mato ebebon joai. Jainoaxa  
ea jawebi winóyamaí ixonra mato  
shinannai; ja en teneyamai jakonma  
jawékibo aborestira matón shinanai.

<sup>11</sup> ¡Jabaonkayaki shinanai ea iboa-  
makana nokon xobo yometsobaon kini  
keskáakin ati? Jatíbi nato jawékibora en  
oinke. Ea, Ibonbira, onantiakin yoi.

<sup>12</sup> Nokon xobonko Siló ikain katanwe,  
jara jain iti reken japari en katota iki,  
itan oinkanwe nokon joni Israelbo jatón  
jakonma aká kopí en aká.

<sup>13</sup> Aribaxonbi aríbakin akinra en  
matón ikábo yoia iki, eki yoiti itinra  
mato keenyamaa iki, itan jawebira  
matón ea yoiamaa iki. Ea, Ibonra, onan-  
tiakin en yoi.

<sup>14</sup> Jakopíra, ja Silonkonía xobo aká  
keskaribiakin, ja ea iboamakana xobo  
en akai, jara en mato menia iká iki,  
jainoax matón rekenboribira en menia  
iká iki, jakira mato ikoni koshiai iki.

<sup>15</sup> Ebebonmeara moa en mato potati  
iki, ja Efraínman chiní bakebo matón  
wetsabo, moatian en aní keskáribiakin’.

#### **Israel jonibaon joi senenhayamaa**

<sup>16</sup> Mia, Jeremíassen, nato jonibo kopí  
oranyamawe, jato kopí yokákin ea  
teayamawe, enra mia ninkáxontima iki.

<sup>17</sup> ¡Minki oinyamai Judá jemanko itan  
Jerusalén callenko neskara jawékibo  
akanai?

<sup>18</sup> Bakebaonra karo tsinkiai, papabaon  
chii keteara tiritai, jainxon ainbobaonra

harina torta ati meinnai jaskáxonra diossa menikanai jawen jane naikanmea reina. Jaskáribiaxonbira wetsa diosbores uva xeati menikin ea sinámakeanai.

<sup>19</sup>Ikaxbi ea jakonma shinanmakaskin-bira jatonbinix jakonmakeanai, jaskatira jatonbinix rabinkanai. Ea, Ibonra onantiakin yoike.

<sup>20</sup>Jakopíra ea Ibon, ikonshaman yoiái, nato neno iká jonibokira nokon siná en jatoki pakeai, yoinaboki, niiboki, wai-boki itan baná bero tsekati-boki. Chii tiri keská ikaxa nokatima iki”, ikira iká iki.

<sup>21</sup>Jatíbi atipana Ibo, Israelbaon Diossa, jonibo akí neskata iki: “Jatíbi yoinabo menikin jatiobi keyokin meno-kanwe jainxon yoinabo menokin jatíribi bixon ja nami pikanwe.

<sup>22</sup>Ikaxbira maton rekenbo Egipton-konia en pikonontian, jaskáakin keyokin yoinabo menoti itan jaskáakin yoina keyokin menotimabo jawebi en jato yoiamaa iki.

<sup>23</sup>Ikaxbira neskarares en mato yoiá iki, nokon joi ea ninkáxonkanon ixon; jaskara ikenra Dios ea iti iki, jaskatata nokon jonibo mato iti iki. Itan en jato jaskara iti yoiá keskati ikanti, jaskatata jakon ikantira iká iki.

<sup>24</sup>Ikaxbi eki yoitimakin jawebi ea ninkáxonkashamkana iki, jaskáyamakinra ikonbires yoitima ikax jaton shinan jakonma ixon jakonmaori jato boá iki. Ea rabititianbira eki jakonmai yoyo ikana iki.

<sup>25</sup>Reken papabo Egiptonkonix pikonontianbira ramakamanbi en mato chibanmakin en mato raana iki jatíbi mato nokon yonoti profetabo.

<sup>26</sup>Ikaxbira mato eki yoitimakin jawebi maton ea ninkáxonkashamaa iki, jaskara ikaxa maton reken papabo iní winobainbires ikax mato kikinbires chorishbo iká iki.

<sup>27</sup>Jeremías, mia ninkáyamakanabi, jatíbi jawéki jato yoiwe, mia jen ayamakanabi saí iwe.

<sup>28</sup>Jato yoiwe: ‘Nato mainmeabora jaton Ibo Dioski yoitimaibo iki, jaton

jakonmabo yoixontinra keenyamakanai. Matonra akonbireskin jenea iki, mato betan jaskara ati en shinanna joira maton senenhayama iki’ ”, ikira iká iki.

### Ikonma dios

#### Jerusalénhainxon rabikana

<sup>29</sup>Jerusalén jonibó, maton masá shinanai onanti inon ixon maxkoroxon maton boo potakanwe! ¡Tsoa jonibi jain jayamai matokameax onisi bewakanwe! Jaskara ikenra Ibo maton joniboki sinata iki. Jaskatira jaton keenyamaa iki itan jato jenea iki.

<sup>30</sup>Ibonra onantiakin yoiá iki: “Ikonbiresi ea keenyamai jawékira Judá jonibaon ake: Ea iboamakana rabiti xobonkora ea keenyamai ja rabiti aká jawékibo maton ake, ja meké jawékira maton ramiake.

<sup>31</sup>Mai teshanpa Ben-hinomhain Tófelhain makan tsamanxonkanara iká iki, jain jaton benbo bakebo itan ainbo bakebo perakanxon menoti akanara iká iki, jaskara akanon ixonra en jato yoiamaa iki, enra jaskara shinanamabobi iká iki.

<sup>32</sup>Jakopíra eabi, Ibo ixon, onantiakin en yoike ja nete nokóketianra moa janeyamanox ikanai Tófel, akin itan Ben-hinon akinra rama janenox ikanai ja Ben-hinon teshanpa. Jatianra mawábo jain miinti yamaketian Tófelhain miinkanti iki.

<sup>33</sup>Ja mawata jonibaon yorabora pimis tetébo betan yoina sinábaon piaitian tsonbi ibintima iki.

<sup>34</sup>Enra ati iki Jerusalén callenko itan Judá jemanko fiesta akí bewatibo, raroi bewatibo itan wanoi bewatibo keyokin, jatíbi mainkora tsoa jonibi jain jatima iti iki”, ikira iká iki.

#### Jeremías jawen jonibo kopí chexakaata

**9**<sup>10</sup>“Mananbaon kaax winitankanwe, itan ishi iitankanwe, pastonkobo kaax chexakaati onisi bewatankanwe, moara menóke tsoabira jain winóyamai;



waka maan ikai ninkátibira moa yamake,  
noyai yoinaboyabira siná yoinabo moa jabati bokanke.

<sup>11</sup> Makan tsamata keská itiakinra en Jerusalén imai,  
chacal yoinabo jain jonetai itiakin;  
Judá jemabora jain jawebi yamatiakin en imai,  
jatianra jain jonibo yamati iki”,  
ikira iká iki.

<sup>12</sup> ¿Tsoarin ja kikin onan shinanya, neskara jawéki onanti? Tsoabira yamake. ¿Tsoaki Ibon onanma iki, neskara jawékibo noa jakonshamanhakin yoiti? Tsoabira akáma iki. ¿Jawekopíki nato mai moa ras aka, tsoabi jain winoti atipanyamaa, jain jawebi xoxoyamai manan choshi keská iki?

<sup>13</sup> Jatianra Ibon yoia iki: “Jatíbi nato jawékibora winota iki, en onanma jawékibo israelitabaon jenekana kopí; eki yoitimakinra, ja en ati yoiabo atitianbi ayamakana iki.

<sup>14</sup> Jatón shinan jakonmanin imaara, ikonma diosbo rabikana iki, jatón reken papabaon jato onanmaa keskákin.

<sup>15</sup> Jakopíra ea jatíbi atipana Ibo, Israelbaon Dios ixon en yoike: Enra mato pimai kikinbires moka jawéki, itan mawáti raoya onpaxa en mato xeamai.

<sup>16</sup> Matonbi itan maton papabaonbi onanama maibotiibira jatíribibo en mato janbismai; maton rawíborá en mato chibanmati iki, mato wetsa tsamára mato betan reteanankin mato keyokanti iki, westíorabi texeyamai kamanra mato akanti iki”, ikira iká iki.

**Jerusalénhainoax onisi  
winiananbi yoyo ikana**

<sup>17</sup> Jatíbi atipana Ibonra yoia iki:  
“¡Ninkakanwe! Onisi yoyo iananbi winiti  
onanshaman ainbobo kenakanwe”,  
ikira iká iki.

<sup>18</sup> ¡Ishton bebákanon, jatianra noa kopi onisi yoyo iananbi winikanti iki;

non beronkobo noa beon bochomaxonbakanon,  
jatianra non bero kabichibo onisi winii beon meranbires iti iki!

<sup>19</sup> Jerusalénhainoax chexakaati sion ikaira nokibi nokotai:

¡Jawe ireskiai, jawekeskatiki ras ikax jawebioma noa baneta!,  
¡Jawekeskatiki rabinkin masá tenetiaín noa nokota!

Non maira non jenebainti jake, noa jain jatibora moa keyota iki.

<sup>20</sup> Ibon joi, ninkakanwe ainbobó, jawen joi yoiái netékainxon ninkakanwe.

Maton bake ainbobo jaskati winiti axeakanwe,  
itan mato betan raenanaibora, onisi bewati maton axeati iki:

<sup>21</sup> “Non xobobaonra mawá jíkike, non apobaon xobo ikainbora nokóke;

callemea bakebora jato reteke, plazainoa bakeranonbora reteke.

<sup>22</sup> Joni mawatabora tipibainke, nii xabá ikain yoinabo poia keská, itan

ja baná tsekai joni pekáo trigo bimi maanna,  
moa tsonbi biamai keská”.  
Ea Ibonra jaskara yoike.

<sup>23</sup> Ibonra yoia iki:

“Ja onan jonira jawen onanman rabítima iki,  
ja koshi jonira jawen atipana koshin rabítima iki,  
ja kopí jawéki ichayara jawékinin rabítima iki.

<sup>24</sup> Ja rabítinin keenaibora, ea onannaton rabíkanti iki, itan ea riki Ibo ixon onannaton iti iki,

nato netenxonra noixon en akai, atikeskabiakin  
itan pontéres, jaskarara nokon keen iki,  
Ea, Ibonra onantiankin yoike”,  
ikira iká iki.



Oi beyamaitian kikinni choshia

**14** <sup>1</sup>Jawékibo choshiaitianra, Ibon Jeremías, yoia iki:

<sup>2</sup> “Judá jonibora onisi winiai, ja jemamea jonibora onitsapikin meskó shinanni ikanai, jonibora main tipiabo ikanai. Shinan meran chexakaatira Jerusaleón jonibo saí ikanai.

<sup>3</sup> Icha jawékia jonibaonra jaton yonotibo onpax biti jato raanke; jabora jain onpax atinko bokanke, ixonbira nokoyamakanke, jaweomara jaton chomo bekanai, ja bikasaira biamakanke, itan kikinni rabinnaxa, mapota ikanai.

<sup>4</sup> Wain teetaibaonra ja bikasai biamakanke, itan rabini mapotara ikanai, oi yamaax mai chorish iketian,

<sup>5</sup> nii meranoa chaxobaonra pikó benabi, jaton bakebo jeneke, jaskara ikenra ja piti xobi yamake.

<sup>6</sup> Tsoa jonibi jain jaama mai mato-kanra, inaatima asnobo chankáke; jainxonra chacal yoinabaon akai keskáakin koshin niwe joinnai; jaskara ikenra ja piti pasto yamaketian jawen bero koinnai”, ikira iká iki.

**Jonibo kopí profetanin Ibo orana**

<sup>7</sup> ¡Ibó, non ochabo akátoninbi noa jakonmaakin yoiainbi, min jane jakon ninkakaamawe! Ichabiresira noa miibetan senenma iká iki, noara miki ochaa iki.

<sup>8</sup> Israelbora mion manata iki, atikoma nete nokoketianra min noa xabaai, ¿Jawekeskatiki wetsankonia joni joax ikai

keskatires nato main mia ikai, westfóra joni ochó kaai yamébi-chores ikai keskati?

<sup>9</sup> ¿Jawekopíki joni moa shinan ramita keska ikáx, westiora reteananti onan jonin jato akinti atipanyamaa keská mia ikai?

Ikaxbi, Ibó, miara noo xaran iki, jatíxonbira onankanke noara min jonibo iki;

¡Noa jeneyamawe!

<sup>10</sup> Ibora Israel jonibo yoií neskata iki: “Nato jonibora eki yoiti ititianbi jaton keena keskáres akanai, jatíbi-tian wetsankobo boantantinin keenra ikana iki. Jakopíra jakonshamanhakin en jato oinyamai. Ramara jaton ocha akábo shinanxon en jato shinanmai, itan jaweati maton jaskarabo akárin ixon en mato yokáti iki”, akinra aká iki.

<sup>11</sup> Ibonra ea yoia iki: “Nato jonibo jakonti kopí, yokákin ea teayamawe.

<sup>12</sup> Ichabiresakin ayunanson maton ea yokákenbira, en mato ninkáxon-yamai; ichabiresakin yoinabo jatiobi keyokin maton ea menoxonkenbi itan baná berobo maton ea bexonkenbira, jakonhaxon en mato oinyamai. Reteanantinin, itan pitin imaxon, jakonma isin en mato keyomati iki”, akin.

<sup>13</sup> Jatianra en kenwina iki: “Ikaxbi, oinwe, Ibó; profetabaonra jonibo yoiái moa reteananti yamati, pitin itimaribi, itan jawe iamai jakonshamanres basibires nato neno min jato imati”, akinra en aká iki.

<sup>14</sup> Jatianra Ibon ea yoia iki: “Profetabora nokon janenko jaskara yoií jansokanai. Enra jato raanama iki, enra jato jaskáti yoiama iki, jabo betanra ea yoyo ikama iki. Ja yoiikanaibora ikonma iki, namákeska meran oinnara ikonma iki, jaton janso shinanbira yoikanai. Jaskara ikonma jawekira profetabaon yoia iki.

<sup>15</sup> Jaskara ikenra, ea Ibo ja profetabo yoií ikai, en jato raanamabira nokon

janenko yoyo ikasi ikana iki, jatianra yoikanai, reteanantibi, itan pitin itibira nato main yamai ixon: ja profetabora reteanantinin, itan pitin jato reteti iki.

<sup>16</sup> Jato jaskáakin yoiai joniboribira, reteanantiain itan jawékiatinin mawati iki, jaton awinbo jaton benbo bakebo itan bake ainboboribi. Ja mawá yorabora Jerusalén jema callebaon potakanti iki, jatianra tsoabi jan jato miinti yamati iki. Jaskáaxonra jaton jakonma aká en kopíamati iki.

<sup>17</sup> Jonibo jato neskara yoiwe:  
‘Yaméyabi, neténra winii,  
jatfíbitian jenekantima iki,  
nokon jonibo kikin rabintibires  
winota kopí,  
ja xatekan imaara yosmashoko  
ikanti iki.

<sup>18</sup> Xabain pikóxonra, reteanantiainoax mawátabaon yorabo kikin icha en oinna iki;  
jeman jikixon en oinnara,  
jonibo pitin mawataibo kikin icha iká iki.  
Profetabo, itan sacerdotebobira jaton onanama mainko bokanai’ ”, ikira iká iki.

#### Profeta Jeremíassen Ibo yoia

<sup>19</sup> Ibó, ¿Judáki ikoni moa mia jaon keenyamaa iki?  
¿Jerusalén jemamea joniboki moa min omisa iki?  
¿Jaweatiki raontimaakin min noa xatea iki?  
Jawékia itin noa manatabira,  
jawe jakon jawékibi noki nokoyamaa iki.  
Benxotininra noa manata iki.  
Ikaxbira onsá jawékibores jake.

<sup>20</sup> Non jakonma akára non onanke, Ibó,  
itan ja non rekénbaon ocha aká iboa kopíra;  
noa miki ocha iki.

<sup>21</sup> ¡Min jakon jane kopí, noa omisshamawe;

jain min pené yakati iketian  
ja jemamea jonibo iresabires imayamawe!

¡Ja senenhabe konti joi min noobetan aní shinanwe, ja senenhakashamai iamawe!

<sup>22</sup> ¿Jakia ja ikon Dios onanmabaon jatonbi aká ja

ikonma diossen ja rabikanaiton oi bemai?

¿Akiai naikan janbi oi bemakin?

¡Ikáma, non Ibo Diosé!

¡Jan bemaira mia iki,

Mia riki jatfíbi neskarabo akai;

jakopíra mion noa manatai!

**15** <sup>1</sup> Ibonra ea yoia iki: “Moisés betan Samuel neno ebebon jokebira, nato jonibo en noibatima iki. Jato yoiwe ebeboeax botankanon ixon.

<sup>2</sup> Jatian jaweranoki noa kati iki ixon mia yokákanara, neskáakin en mia yoia min jato yoiti iki:

‘Ja keyomis isinman mawátibora,  
ja isinman reteti iki;  
ja reteanantiainoax mawátibora,  
reteanantiainoax mawáti iki;  
ja pitin mawátibora,  
jato pitin reteti iki;  
ja yatanxon wetsanko bokantibora,  
yatanxon wetsanko jato bokanti iki’.

<sup>3</sup> Ea Ibonra, onantiakin yoiai: Enra chosko keská jan masá teneti matoki raanai: Matora reteanantiainxon retakanti iki, ochítibaonra maton yora niniti iki, tetébaonra mato piti iki, siná yoinabaonra mato keyokin piti iki.

<sup>4</sup> Jatfíbi maibotiibi iká jonibora, en jato aká oinnax kikinni rakékanti iki. Ja Ezequíassen bake Manasés, Judáino apo ixon, Jerusalénhainxon aká jawekibo kopíra en jato jaskaati iki.

<sup>5</sup> ¿Jerusalén jonibó, tsonmein mato noibaxon onísati iki?

¿Tsoaki mato kopi winiti iki?

¿Tsonki isinyamanon ixon mato akinti iki?

<sup>6</sup> Matonra ea jenexon, jakonmakin yoia iki.

- Ea Ibonra, onantiakin yoike.  
 Jaskara ikenra en moa manati  
 paxkinxon,  
 mato masá tenemanoxon nokon  
 meken en sanana iki,  
 jatianra en mato keyokin ras aka  
 iki.
- <sup>7</sup> Maton jonibora xobi choshi atin en  
 janbisaa iki,  
 ja mainmeara, jemabotiibi ikanai-  
 noa en jato pikoa iki;  
 nokon jonibora jawe bakeomabi en  
 jato banea iki,  
 enra jato keyoa iki, jaton  
 jakonma akaibo jenekashamakanai  
 kopí.
- <sup>8</sup> En imaara jato xaran icha ainbo  
 benomatabo iká iki,  
 aniparonkonía mashi pototi bebon  
 ichara ikana iki.  
 Bariapanshamanra titabo jaton  
 bake ranonbo  
 betan en jato mawámaa iki;  
 ratereskinra jan masá teneti itan  
 onsá jawéki rakéti ja ainboboki  
 en pakea iki.
- <sup>9</sup> Icha bakea titabora beyosi,  
 join keyokana iki;  
 rabinna itan namanbiresa  
 shinanmeekana iki,  
 netén tenaa ikenbi jatoki yameta  
 iki.  
 Jaweti mawatamabora,  
 jaton rawibaon en amaa jato  
 retekantiki.  
 Ea, Ibonra, jaskara en ati joi yoike”,  
 akin.
- <sup>10</sup> ¡Jawe ireskiai nokon titá, ea pikoira  
 mia bakena iki,  
 jatíbi nato netemeabo betan join  
 iti, itan  
 reteanantiresa ea min pikoa iki!  
 Tsoabira jaribi banenoxon en koríki  
 bichinama iki,  
 itan tsonribira jaribi baneti ea  
 koríki bichinama iki,  
 jaskara ikenbira jatíxonbi ea  
 jakonma inon ixon yoikanai.

- <sup>11</sup> Ibó, ja jakonma iti ea yoikanabo  
 senenbanon,  
 jakonhakin en mia teexonama  
 iketian,  
 ja rabintiaín itan masá tenetiaín  
 ikanaitian  
 nokon rawibo akinnon ixon en mia  
 yokatama iketian.

#### Israel masá tenemati Diossen yoia

- <sup>12</sup> Ibonra yoia iki: “¿Tsonki ati iki  
 norteorikea jaton rawí beaibaon  
 jan amisti hierro betan bronce  
 ras akin?
- <sup>13</sup> Israelbo, jatíbi maton ochabo  
 kopíra,  
 maton icha jakon jawéki itan maton  
 kopí  
 jawékibo maton rawibo en meniai,  
 jatíbi ja maton main mato jayatabo,  
 en meniara kopímabi bokanti iki.
- <sup>14</sup> Maton onanama mainkora,  
 maton rawibaon yankabires yonoti  
 en mato imati iki,  
 keyomis tirí ikai keskatira nokon  
 kikinbires siná ketéke”, ikira iká  
 iki.
- <sup>15</sup> Ibó, jatíbira min onanke,  
 ¡Ea shinanwe itan ea akinni jowé!  
 ¡Jakónmaanoxon ea chibanaibo ea  
 kopíxonwe!  
 Jabaon ea akaitian jaweayamakin,  
 ea retekanai kaman jato oinres-  
 shamawe;  
 oinwe, mia kopi eki jakonmai yoyo  
 ikankenbira en teneresai.
- <sup>16</sup> Ea min yoyo anontianra, min joi en  
 akonkin ninkata iki;  
 janra ea jakonshaman, itan nokon  
 shinan meran raroshaman ea  
 imaa iki,  
 jaskatira ea mina iki,  
 miara Ibo itan jatíbi atipana Dios  
 iki.
- <sup>17</sup> Jawe ayamai rarotibichores shinan-  
 naibo betanra ea tsinkitama iki;  
 min ea iboanontian peokootaxa,  
 eabichobiribi jaa iki,

jaskara ikenra jaki mia sinatai  
ochakiribi ea sinata iki.

<sup>18</sup> ¿Jawekopíki nokon chexá jawe-  
tianbi keyóyamai?

¿Jawekopíki nokon xaté moa  
raontima iki,  
jatíbiakin raonnabiki moa benxo-  
tima iki?

Nokonara mia jain onpax baitai tae  
keska iki,  
wetsatian onpax jaax itan wetsatian  
yamai iki.

### Ibon yoishokoa

<sup>19</sup> Jatianra Ibon ea yoia iki:

“Mia eki joribaketianra en mia  
biribati iki,  
jatianra min ea tee axonti iki.  
Moa iresbiresi yoyo iamakin,  
ikon jawékibores yoiai ikaxa,  
ea yoyo ixonai mia iti iki.  
Jabaonra min yoia ninkáti iki,  
jabaon yoiaira min ninkátima iki.

<sup>20</sup> Nato jonibaonara, bronce chiké  
keská en mia imati iki,

tsonbi jatoarestima.  
Miibetanra reteanankanra,  
miaareskantima iki,  
míibetan ixonra mia akinhanan,  
en mia xabaati iki.

Ea, Ibonra, jaskara anoxon yoike.

<sup>21</sup> Jakonmabaon koshinkoniara en mia  
xabaati iki,

¡Sináxon ishton jakonma akaiboiba-  
keara en mia píkti iki!” akinra  
aká iki.

Mapokan teetai joniki yoinmeeta joi

# 18

<sup>1</sup> Eara Ibon yoia iki:

<sup>2</sup> “Tenaman katanwe ja mapokan  
teetai jonin xobonko, jainoara en mia  
joi yoiti iki”, akin.

<sup>3</sup> Ea, Jeremíassa, naman ipakexon, ja  
mapokan teetai joni en nokoa iki, jan  
mapó raseneatinin akí iitaitian.

<sup>4</sup> Ja akai jawéki jakonma iketianra,  
jakiribi ja mapóbi aríbaa iki, jawen

keena keskashamanhakin akai kamanra  
aká iki.

<sup>5</sup> Jatianra ea Ibon yoia iki:

<sup>6</sup> “¿Enki nato jonin mapó akai keská-  
ribiakin mato, israelitabobi, atima iki?  
Matora nokon mekenman iki, mapokan  
teetai jonin mekenman iká keskaribi.  
Ea, Ibonra onantiakin yoike.

<sup>7</sup> Ea keenxonra wetsatianbires,  
westíora mai iamaxon westíora apo,  
kikinhakin keyokin ras ati en yoiti iki.

<sup>8</sup> Ikaxbi ja main ikábaon jaton  
jakonma jeneketianra, jan en jato masá  
tenemati shinannaton jato masá tene-  
matima iki.

<sup>9</sup> Wetsatianra en shinanai westíora  
main jaa jonibo, iamaxon westíora apo,  
jatibinin jato bebonmati.

<sup>10</sup> Ikaxbi ja jonibaon ja mainxon  
jakonma aketianra, ja ati yoia en moa  
ayamai, jatianra jakon jawékibo en jato  
benxoaxona moa axontima iki.

<sup>11</sup> Jerusalénhainoa itan Judáin iká  
jonibo jato yoiwe ea, Ibonra yoiai:  
‘Mato ramianoxon shinannira ea iitai;  
mato masá tenematira en shinanai. Moa  
jakonmai jaai jenékanwe; bebon jakonni  
jakanwe itan jakon jawékibo akanwe’,  
akin.

<sup>12</sup> Jaskara ikenbira jabaon mia yoiti  
iki: ‘¡Yankabires yoyo iamawe! Non  
keena keskábiribira noa jakasai, non  
shinan meran yoitimakinra jakonma  
jawékibo non chibanai’”, akin.

<sup>13</sup> Jaskákinra, Ibon yoia iki:

“Maibotiibi ikábo jato yokáwe,  
neskara jawékiboribimein wetsa-  
baon ninkata iki.

¡Israel jonibaonra  
onsá jakonmabires jawéki aká iki!

<sup>14</sup> ¿Líbano manan maxkaten shanka  
ikain wishnin

matsi tsamataki wetsatianbo keyota  
iki?

¿Ja mananmameax matsi jene  
maannaiki tsosinti iki?

<sup>15</sup> Ikaxbi nokon jonibora eon shinan-  
benokana iki,

inciensio iníntibora ikonma diosbo  
menoxonkanai.

Nokon moatian jaskara ati shi-  
nanna esé  
chibanyamakinra maton shinanres  
akáx mato benota iki, itan manota  
iki.

<sup>16</sup> Jaskatira jaton mai, tsoa jonibi jain  
jaama banetax,  
jatíbitian jaki shirokanaires iká iki.  
Jatíbi jan winotaibora  
kikinni rateti boski ikanti iki.

<sup>17</sup> Eará, bari pikotaiorikea niwe keska  
ixon, Israelbo en jato janbismaa  
iki;  
jaton rawiboibakeara en jato jabá-  
mati iki.  
Jaton masá teneti nete noko-  
ketianra,  
maton jakon ayamaitian, jakon-  
maires ea matoki yoyo ika iki”,  
akin aká iki.

#### Profeta ramiati shinan akana

<sup>18</sup> Jonibora yoyo ika iki: “Jeremías  
nobé iamanon ixon jaskáaxon potati  
shinanon akanwe. Jabaon noa axeati  
sacerdotebora jawetianbi noa maxká-  
tima iki, jabaon noa esetibo onanbori-  
bira noa maxkátima iki, jabaon Diossen  
joi noa yoiiti profetaboribira noa maxká-  
tima iki, Retekanon ixon jakonma aká  
riki ixon yoinon akanwe. Ja yoiái jawebi  
ikonhayamanon akanwe”, ikira ikana  
iki.

#### Jeremíasnin orana

<sup>19</sup> Jeremíasnenra yoia iki: “¡Eapari  
akonkin ninkawe, Ibó!  
¡Nokon rawíbo ea yoií ikaibo  
ninkáwe!

<sup>20</sup> ¿Jakomaninki non jakon kopíati iki?  
¡Jabaonra ea reteti shinanke!  
Shinanwe jaton paranan ikí yoyo  
ikira  
ebetán beibanana iki, moa jatoki  
mia kikinni sínáyamanon ixonra en  
mia yokata iki.

<sup>21</sup> ¡Ikaxbi rama, jaton bakebo  
jato piti retemawe, iamax reteanan-  
tiainxon jato mawámawe;  
ibakanon jaton awinbo benomati  
itan bakeomabo baneti!  
¡Abánon retemis isiman jaton  
jonibo mawámakin,  
itan jaton bake ranonbo reteanan-  
tíainoax mawábakanon!

<sup>22</sup> Jato ati ratereskin westíora tsamá  
yometsobo raanwe;  
¡Abákanon raketi sion ikanai  
ninkákin!  
Jain ea niatira mai chinikanke,  
jain winoti ea pakéti trampara moa  
akanke.

<sup>23</sup> Ibó, ikaxbi minra, ea jaskáaxon  
reteti shinanakanabo jatíbi  
onanke.  
¡Jaton jakonma aká kopí enra jato  
moa shinanxonyamai iki iamawe,  
jaton ochabaonribi shinanbeno-  
yamawe!  
¡Mibebon jato pakémawe, kikinni  
sináxon jato masá tenemawe!”  
akinra aká iki.

#### Chomo toetaki yoinmeeta joi

**19** <sup>1</sup>Ibonra ea yoia iki: “Oinwe,  
westíora mapó chomo marowe,  
jaskáaxon jemamea joni koshibo itan  
sacerdote yosibo jato kenawe.

<sup>2</sup> Jainoax Ben-hinom teshanpain  
katanwe, Tiestos Xepóti iká bekeiba,  
jainxon ja en mia yoiái joi yoitánwe.

<sup>3</sup> Neskáakin jato yoiwe: ‘Judá apobó  
itan Jerusalénhain jaa jonibó, natora  
jatíbi atipana Ibo, Israelbaon Diossen joi  
iki, ninkakanwe: Enra matoki anibires  
onsá jawéki raanai, jatíbi jan nato joi  
ninkatabora ikonbiresi rakékanti iki.

<sup>4</sup> Ea potabainxonra, israelitabaon nato  
mai iresabires imakana iki; jainxonra  
ja ikonma diosbo inciensio inínti meno-  
xonkana iki, jatonbi itan jaton reken  
papabaonbi, jainxon ja Judá apobaonbi  
onannama, jainra jawe jakonma akáma  
jonibo retekana icha jimi iká iki.

<sup>5</sup> Jainxonribira, jainxon jawéki menotibo axon, ja dios Baal axonkin, jaton bakebo jatiobi keyokin menokana iki, ja jawékira iká iki en jato ati yoiama, jara nokon shinan meran yamabobi iká iki.

<sup>6</sup> Ninkakanwe, jaskara ikenra netebo nokoti kaai nato main jane moa Tófet itima, Ben-hinom teshanpa ikáribira itima iki, jainxon jato retekanai teshanpa ikákayara jawen jane iti iki. Ea, Ibonra onantiakin yoike.

<sup>7</sup> Nenonxonra ja Jerusalén jonibo, itan Judáinoa jonibaon jaskara ati shinanabo en ras ati iki. Jaton rawíbo, en amaara jatoareskanti iki, jaskáaxonra jato retekanti iki, jatianra tetébaon, itan siná yoinabaon jaton yora piti iki.

<sup>8</sup> Ja jemara tsoa jonibi jain jaama itiakin en imai, ja oinnax rakékantibires. Jatíbi jain winotaibora akonbireskin ras akana oinnax ratetax, rakékanti iki.

<sup>9</sup> En amaara jaton bake benbobo itan jaton bake ainbobo pikanti iki, jatianra jato retenoxon jaton rawibaon ja jema katekanketian pitin iki jatonbinix piananankanti iki’.

<sup>10</sup> Jaskara yoia pekáo, ja mibé iká jonibo bebonxon ja chomo beshéakin toewe,

<sup>11</sup> jainxon jato yoiwe: ‘Jatíbi atipana Ibonra neskara yoia iki: Nato jonibo itan nato jemara, en besheati iki, mapó chomo beshéaka moa jakiribi jakonhatikoma ikai keskáakin. Jatian icha mawákanketianra jain jato miinti moa yamaketian, jonibaon jaton mawábo Tófet-iain jato miinti iki.

<sup>12</sup> Ja jema betanbira jawen jonibo en jaskáati iti iki. Tófet keskáshamanribira ja jema en imati iki. Ea, Ibonra onantiakin yoike.

<sup>13</sup> Ja Jerusalén xobobo, ja Judáinoa apobaon jain apo iká xobobo, jatíbi joétai wishtinbo jainxon incienso ininti menoxonkatikanai xobo pekábo itan jaton diosbo menikin uva xeati chikokatikanaibora, Tófet keskáribi moa kerás iti iki’ ”, akin.

<sup>14</sup> Jaskara aká pekáora, Jeremías Tófethainoax karíbaa iki, jawen janenko yoyo iti Ibon jain raanainra kaa iki, jatianra Ibon xobon jikitiain chankáxon, jatíbi jonibo jato yoia iki:

<sup>15</sup> “Ja jatíbi atipana Ibo, Israelbaon Diossa neskatai: ‘Nato jema itan jatíbi maxko jemankobora, jatíbi jaskaraton masá teneti en yoiabo en raanai, nokon joibo ninkákashamakin jaton keena keskáres akana iketian, ikira ikai’ ”, akin jato aká iki.

### Jeremíasnin rawí Pashur jaskara winóti yoia

**20** <sup>1</sup> Jatianra Pashur, ja Imernin bake, sacerdote itan Ibo rabiti xobo koiranaibaon koshi ixon, Jeremíasnin ikamatianbi nato joi yoiatian ninkáxon,

<sup>2</sup> rishkionxon, cepo meran jawen tae ati jato yoia iki. Ja Benjamínman Bochikia Xepóti ikain, ja Ibo rabiti xobo pataxbi.

<sup>3</sup> Westíora nete pekáora ja ceponkonía moa Jeremías jato pikomaa iki, jatianra Jeremíasnin Pashur yoia iki: “Min jane Pashur ikenbira, Ibon wetsa jane mia ake, min janera Magor-misabib iki.



*Jeremías cepo meran akana.*

<sup>4</sup>Jaskara ikenra Ibon yoiai: ‘Minbix, itan mibé raenanaibaona jaki rakéti onsára en mia imai; min oinnonbira mibé raenanaibo reteanantiainxon min rawibaon jato retekanti iki. Jatíbi Judáin jaa jonibora Babilonia apo, itan jawen sontárobo en jato meniti iki, janra yatanxon Babiloniain boxon chichikanin chachixon jato reteti iki.

<sup>5</sup>Jainxonribira nato jemamea jaton icha jakon jawékibo jaton rawíbo en meniti iki, jatíbi jato jayata itan jaton kopí jawékibora en jato meniti iki, jainoax Babiloniain bokanon ixonra, Judáinoxa apobaon jatíbi kikin kopí jawékibo en jato meniti iki.

<sup>6</sup>Jatian mia, Pashur, jatíbi min kikin rarebobo betanbira yatanxon Babiloniain mia bokanti iki. Jainoaxa mia mawáti iki, jainra mia itan jatíbi mibé raenanaibo jansoakin jaskara itibo min jato yoikatitaibo betanbi mia miin-kanti iki’ ”, ikira iká iki.

**Chexakaakin Jeremíasnin  
Ibo keshana**

<sup>7</sup>Ibó, minra ea parana iki, jatianra enbi mia paranmaa iki, miara ebebonbires koshi iká iki, jaskákinra min eaaresa iki. Jatíbitianra ea oinxon osankanai; jatikaxbira eki shirokanai.

<sup>8</sup>Ea yoyo ikaitiibira jakonma iti, itan keyóti joibores en yoai; jaskaraira min joi yoiai kopíra, jeneyamakin ea jakonmakín yoikanai, itan eki shirokanai.

<sup>9</sup>Wetsatianra ea ikai: “Moara en Ibo shinanyamai, jawen janenkora jakiribi ea moa yoyo imai” iki.

Ea jaskataitianra ja emeran iká min joi, keyomis chii tiri keská ikai, xao kamanbira ea menoai. Moa en yoikashamaabira jeneti-koma iki.

<sup>10</sup>Jakomanin yoinmis jonibo

joikanaira en ninkatai:

“¡Jatíbiainra jaki rakéti onsá jake!” Neskatira yoyo ikanai: “¡Neri bekanwe, jakonma akátonin yoinnon akanwe!” ikibo.

Nokon ebé raenanaibora en jakonma atin manákanai. Neskatira yoyo ikanai:

“Paranxonra non abirati iki, nonhareskin; jatianra kopikin já non ramiati iki”, ikira iká iki.

<sup>11</sup>Ikaxbi Ibó, miara ebetan iki, ja reteanannai joni tsonbi jaarestima keská; ea ramianoxon chibanaibora pakékanti iki, itan eareskantima iki; jaton keena ayamaaxa, rabinkanti iki, ja jakonma ikanara, jawetianbi shinanbenotima iti iki.

<sup>12</sup>Jatíbi atipana Ibó, miara atikeskabiakin onanmis iki, jonin kikin chichokea shinanbira min oinnai, jaskáakin ja jonibo jato masá tenemati ea onanmawe, jaskara ikenra akanaketian ea miki koshiai.

<sup>13</sup>¡Iboki bewakanwe, Ibo rabikanwe! Janra ja jakonmabaon meken-mamea, ja paxkinnabo jato xabaai.

<sup>14</sup>¡Jan ea pikóni netera jakonma iká iki! ¡Ea pikoi nokon tita bakenna nete jakonma ibanon!

<sup>15</sup>¡Jawen benbo bake pikota joi boxon jan nokon papa raromaa jonira jakonma iti iki!

<sup>16</sup>¡Jatíbitian yamatiakin Diossen jemabo ras aka keská, ja joni ibanon!

¡Chexakati saí ikanai yamékiri ninkabanón, ja reteananti keshai ikaira bariapan iti iki,



<sup>17</sup> Jaskara ikenra nokon titan chixana meranoa ea Diossen mawámayamaa iki!

Jaskara ikaxa nokon tita ikeanke ea jain miinmeeta, jatianra jawetianbi ea pikóyama-keana iki.

<sup>18</sup> ¿Jaweakiki chexakaati, itan masá teneti kopíres ea pikota iki, rabín meranbires mawánoxki ea iká iki? ikira Jeremías iká iki.

#### Jakonhain nokótinín manátí

**23** <sup>1</sup> Ibonra onantiakin yoia iki: “¿Jawe ireskiai nokon carnerobo manómai itan janbismai pas-torbo!” akin.

<sup>2</sup> Ja Israelbaon Ibo Diossenra, jawen jonibo ikinnai pastorbo yoia iki: “Nokon jonibo, carnero keskábora maton janbismaa iki, matonra jabámaa iki, itan matonra koiranyamaa iki. Jaskara ikenra maton jakonma akábo kopí akonkin en mato masá tenemati iki. Ea, Ibonra onantiakin yoiike.

<sup>3</sup> Jain en jato jabáma mainkoniabora ja nokon joni texeabo enbi jato iká-tiainko beti iki, enra jato tsinkixon, jakiribi jaton itinko bemati iki, jain-xonra icha bakeakanti iki.

<sup>4</sup> Jan jato koirantira pastorbo en imati iki, jawekibi rakéyamakanon ixon, westíorabi maxkátimaakin. Ea, Ibonra onantiakin yoiike”, ikira iká iki.

<sup>5</sup> Ibonra yoia iki:

Ninkakanwe: “David jawen kikin chiní bakeya en imati netera jati iki, jaskáaxon jakon ati onan shinanyaxon jato ikinnai apo, atikeskabiakin jakonhakin itan pontéres ja main jato ikinnaira iti iki.

<sup>6</sup> Ja apo ixon jato ikinnaitianra, Judá moa kishpinna iti iki, itan Israelra jawebi rakéyamai jati iki.

Jawen janera neskara iti iki: ‘Ibo riki, noa jan jatoaresmai’ iki iká.

<sup>7</sup> Ibonra onantiakin yoia iki: Nokóra-noxiki netebo, akonkin senenhanox moa jonibo neskati yoyo itima: ‘Ja israelitabo Egiptonkonía jato pikoni Ibo jaatonin janenkora en yoiai’ iki iti.

<sup>8</sup> Jaskáyamaira ja joi akonkin senen-hati ikax mato iti iki: ‘Ja norteorikea mainmea, itan jatíbi maibotiibi jain janbiskanainkonía, jan ja Israelnin chiníakebo pikoa Ibo jaatonin janen-kora en yoiai’ ikires. Jatianra jaton mainbiribi jakanti iki”, akin jato aká iki.

#### Ikonma Profetabo yoií iká

<sup>9</sup> Nato joira ikonma Profetabo iká iki: Eara ikonbiresi shinan tsokasai, jatíbi nokon yorara saki ikai, eara paenna joni keska iki, westiora joni paen cheata keská, Ibo kopí itan jawen jakon joi kopíra ea jaskatai.

<sup>10</sup> Ja mainra wanoyanixbi teamis jonibo bochoke, ja jonibo riki jakonma akí ish-toaibo, jaton koshiki koshixonra jaskara atimabo akanai. Jaskara kopíra Ibon ja mai jakonma imaa iki, itan tsoa jonibi jain jaama manan-mamea pastobora barin menoa iki.

<sup>11</sup> Ibonra onantiakin yoia iki: “Profetabo itan sacerdotebobira jakon iti shinanhomabo iki; nokon xobonkoxonbi jakonma akanaira en jato nokoke.

<sup>12</sup> Jaskara ikaxa jaton bai yamé itan sibá keska iti iki, en jato amaara ja akáskanai noko-kanti iki, jaskatira paketai keská ikanti iki.

Jaton akábo yoixontitianra, jan masá teneti jakonma en jatoki raanti iki.

- Ea, Ibonra onantiakin yoike.
- <sup>13</sup> Samaria profetabora en oinke,  
ea ramiakin yoikanai:  
rama iti jawékira Baalnin janenko  
yoikanke,  
jaskáxonra ja nokon Israel jonibo  
jato benómakeanke.
- <sup>14</sup> Jakonmabires jawékibo Jerusalén-  
hainoa profetabaon akaira en  
oinna iki:  
Wanoyanixbi teamiskanai, paran-  
miskanai,  
jawekeskaaxonbi jakonma akin  
jenetimara  
jato shinanmakana iki.  
Jabobi itan ja jemamea jonibora  
en oinna  
Sodoma betan Gomorrainoabo iní  
keskáboribi iki.
- <sup>15</sup> Jaskara kopíra, ea jatíbi atipana  
Ibon,  
profetabo mato ramiati en yoiai:  
Kikinbires moka jawékira en jato  
pimai;  
mawá raoya onpax akára en mato  
xeamai,  
ja Jerusalénhainoa profetabaon  
jakonma aketian, ja mainkoxon  
jatíbiainxon jakonma akana  
kopí”, ikira iká iki.
- <sup>16</sup> Jatíbi atipana Ibonra yoia iki:  
“Israelitabó, profetabaon mato yoia  
ikonhayamakanwe.  
Jabaon yoiaira ikonma jansores iki,  
jara jatonbi pikoa joibo iki,  
jara en mato yoia joima iki.
- <sup>17</sup> Nokon joi iresabires  
akaibora jato yoikanti iki:  
‘Jatíbira mato jakon iti iki’.  
Jatian yoitimati jenéyamakin jaton  
shinanbi akaibora jato yoikanti iki:  
‘Jawe jakonmabira mato winótima  
iki’ ”.
- <sup>18</sup> Ikaxbi, ¿Tsoaki ja Ibon joné tsin-  
kitiainko  
já betan iká iki?,  
¿Tsonki oinna iki, iamaxon  
tsonki jawen joi ninkata iki?,

- ¿Tsonki netékainxon ninkata iki?
- <sup>19</sup> Ninkakanwe, Ibo kikinni sinatara  
koshi niweaba keska iki,  
jakonmabo akíra jato mananhon  
niweaba koshi keská iki.
- <sup>20</sup> Jan ati shinannabo akáxpápara Ibo  
siná tantiti iki.  
Jatian nato jawékibo shinanxon  
itan maton ninkátira nete nokóti  
iki.
- <sup>21</sup> “Ja profetabora en raanamabo iki,  
jainoax jatora en jawebi yoyo  
akama iki,  
jaskara ikaxbira nokon janenko  
yoyo iki ishtoshaman bokana iki.
- <sup>22</sup> Ebé ixon nokon joné jawekibo  
onanxonra,  
nokon jonibo, ja en onanmaa joi  
yoikeankana iki;  
jaton jakonma axébo itan jaton  
jakonma akaibora en jato  
jenemakeana iki”.
- <sup>23</sup> Ibonra onantiakin yoia iki:  
“Ochó inonbi iamax ochóma  
inonbira ea Dios iki.
- <sup>24</sup> ¿Tsoaki ebebonmeax jonéti iki?  
Nai itan mainkora ea jatíbiai iki.  
Ea, Ibonra ikon yoike.
- <sup>25</sup> Ja profetabo nokon janenko jansoi  
yoyo ikaskanaira en ninkáke,  
jainoax namá meranbo ebetan  
yoyo ikaskanairibira en ninkáke.
- <sup>26</sup> ¿Jawetian kamanki ja profetabaon  
jatonbi shinanxon pikoa ikonma joibo  
yoikin jenekanai?
- <sup>27</sup> Jaton namábo yoiananxonra, nokon  
jonibo eon shinanbenomakaskanai,  
jaton rekenbo eon shinanbenoxon  
Baal dios rabikani keskáribiakina jato  
imakaskanai.
- <sup>28</sup> ¿Profetanin namáxon jawen namá  
jato yoibanon, ikaxbi nokon joi bixon  
ja ninkata keskáshamanribi yoibanon!  
¿Trigo xakára jawen bero keskáribi iki  
itima iki! Ea, Ibonra onantiakin yoike.
- <sup>29</sup> Nokon joi riki chii keska, itan jan  
shanka roroti martillo keská. Ea, Ibonra  
ikon yoike.

<sup>30</sup> Jaskara kopíra en onantiakin yoiái, ja nokon join yometsoananí ikanai profetabokira ea jakonmaatai. Ea, Ibonra jaskara yoike.

<sup>31</sup> Onantiakinra jatoki jakonmakin ja profetabo jatonbi shinanxon pikoa ixonbi en yoiái joi keskáakin yoiKANAIRA nokon keenma iki.

<sup>32</sup> Enra onantiakin jatoki ramíkin yoiái, janso namára profetabaon yoiái; jaton janson itan jaton yoyo ikábaonra nokon jonibo jato benómakanaí. Enra jato raanama iki, jaskara akantiboribira jawebi en jato yoiama iki, jaskara ikaxa ja nokon jonibo akinti onan shinanhoma ikanai. Ea, Ibonra onantiakin yoike”, akin.

#### Jeremías retekaskin akana

**26** <sup>1</sup>Ja Judáin, Josíasnin bake Joacim apo iki peokoonontianra, Jeremías Ibon yoiái iki,

<sup>2</sup> neskáakin: “Ja nokon xobonko jiki-tiainko niwé, Judáin iká jemankonioxbo nokon xobonko ea rabii beai jonibo, jatíbi ja yoiái en mia yoiabo jato yoiwe. Ja min yoitibo keyokin yoiwe.

<sup>3</sup> Min yoiái yoiái ixonra, jaton jakonma axébo jenekanti iki, jatianra jato ati shinanna ixonbi, jaton jakonma akaibo kopí jato masá tenemati en moa shinantima iki.

<sup>4</sup> Ea, Ibon, yoiái jato yoiwe: ‘En yoiái ea yoiái ixonyamakin itan jaskara ati en jato yoiabo senenhamakinra,

<sup>5</sup> nokon yonoti profetabaon jakon inon ixon eseabira yoitimakana iki, ichaakin en raankebira ninkáyamai mato jatoki yoitimata iki,

<sup>6</sup> jaskara ikenra nato Ibo rabiti xobo Silóainoa aní keskaribiakin en ati iki. Jatíbi nato neten iká maibotiibi ikábaon ja oinxon onanti itira, jaki shirokanai nato jema en imati iki’ ”.

<sup>7</sup> Ja Ibo rabiti xobonkoxon Jeremíasnin nato joibo yoiaitianra sacerdotebaon, profetabaon itan jatíbi jonibaon ninkata iki.

<sup>8</sup> Jatianra Ibon ja yoiái joi yoiakin jan senenhaketian, sacerdotebaon, profetabaon, jonibo betan yatanxon Jeremías yoiKANA iki: “¡Ramara mia mawatai! akin.

<sup>9</sup> ¿Jawekeska shinanxon yoiiki mia ikai, Ibon janenkora en yoiái, nato Ibo rabiti xobora Silóainoa iní keskaribi iti iki, nato jema ras akanara jain jaa jonibo yamati iki, iki mia ikai?” Ikira ikana iki. Jatianra jatíbi jonibo Ibo rabiti xobonko, Jeremías kateax tsamákana iki.

<sup>10</sup> Judáinoá joni koshibora, ja ikanai ninkatax, apo iká xobonkoniox Ibo rabiti xobonko bokana iki, boaxa jaskáakin masá tenemati yoiái, bená xepóti ikain yakákana iki.

<sup>11</sup> Jatianra sacerdotebaon betan profetabaon, jatíbi joni koshibo itan jatíbi jonibo yoiKANA iki: “Nato jema yoiái jakonmai yoyo ika kopíra nato joni mawáti jake. Matonbira maton pabíkininbi maton ninkáke”, ikira ikana iki.

<sup>12</sup> Jeremíasja ja joni koshibo betan ja jonibo akí, neskata iki: “Ibo riki jan jawen janenko joi yoiái ea raana, nato Ibo rabiti xobo itan nato jema jakonma iti en yoiara, jatíbi ja en yoiaitian maton ninkata keská iki.

<sup>13</sup> Maton ikábo itan maton jaskara akaibo jakonhakanwe, ja Ibo Dios yoiái ixonkanwe, jatianra jaskara jakonma-bires jawékinin ati mato yoiái moa matoki raantima iki.

<sup>14</sup> Eara maton mekenman iki; jaskara ati maton oinna jakon iketian ea jaskara akanwe.

<sup>15</sup> Ikaxbi, jaskara iketian; kikinhakín onankanwe: ea reteaxa, mato itan nato jeman jaa jonibo, jakonma akáma joni reteá kopí maton masá teneti iti iki; jaskara ikenra ikon riki, onantishamhakin jatíbi jawékibo mato yoiái ea raanara Ibo iki”, ikira iká iki.

<sup>16</sup> Jatianra koshibo betan jonibaon, sacerdotebaon betan profetabo yoiái iki: “Jakopí nato joni non retetira yamake; non Ibo Diosen janenkora noa joi yoiái iki”, ikira ikana iki.

<sup>17</sup> Joni koshibaonra wenixon, ja jonibo jain tsinkitabo jato yoia iki:

<sup>18</sup> “Ezequías Judáin apo inontianra, Morésethainoa Miqueasnin, jatíbi ja jemamea

jonibo Ibon janenko jato yoia iki:

‘Jatíbi atipana Ibonra yoiai:

Jerusalénra mai xabá karanbea keská banéti iki,

Jerusalén ras akanara westíora tsamáres iti iki, ja Ibon xobo jain iká mai matóainra jakonma xobi bochoti iki’ ixon, akin.

<sup>19</sup> ¿Jatían akiakana iki ja apo Ezequías, itan jatíbi Judáinoa jonibaon Miqueas retekin? Akama: Ja apora Iboki raketa iki, jaskákinra jato noibanon ixon yokata iki. Jatianra Ibon jakonmabires jawékinin jato ati yoia, jatoki moa raanyamaa iki. ¿Itan esé senenhayamakin anibires jakonma akanaki non iboati iki?” akin.

<sup>20</sup> Quiriat-jearim, jemamea, Semaías-sen bake, profeta Uríasninribira, Jeremíasnin aká keskaribiakin nato jema itan nato mai jakonmabires jawéki winóti Ibon janenko yoia iki.

<sup>21</sup> Ja apo Joacim betan teetai joni koshibo itan jaton koshibaonra jan yoiai ninkákana iki, jatianra Urías reteti apon jato yoia iki. Ikaxbira ja ninkatax raketa iki, jatianra Egiptonko jabati kaa iki.

<sup>22</sup> Apo Joacimmanra, Acbornin bake, Elnatán itan wetsa joniboribi, Egiptonko raana iki,

<sup>23</sup> jabaonra Egiptonkonía Urías bexon apo Joacim menikana iki, jatianra retexon jawen yora jatíbi jawebiomabo jain jato akanai kininko ati jato yoia iki.

<sup>24</sup> Ahicam, Safánman bakera Jeremías-sen paranan ikí yoyo ika iki, jaskara kopíra retekanon ixon jonibo meniamakana iki.

**Israelitabo jakiribi jaton  
mainko baneta**

**31** <sup>1</sup> Ibora ikai neskati: “Ja Babiloniai-noax moa jakiribi bekanketianra, jatíbi ja Israel jonibaon Dios ea inoxiki, jatianra jabo nokon jonibo iti iki”, iki.

<sup>2</sup> Ibonra yoiai: “Tsoa jonibi jain jayamainkoxonra

ja mawáyamaabo

akonkin en noia en jato oinmaa iki.

Israel jonibaon jain tantiti benaka-naitianra,

<sup>3</sup> jatoki pikoxon en jato yoia iki:

Jatíbitianbiresa en mato noia iki;

jaskákinra akonkin noikin en mato jeneyamai.

<sup>4</sup> Israelbo, jakiribira maia en mato imai.

Jatianra shaka atiyabo raroshaman mato ransai joti iki.

<sup>5</sup> Samaria mai mató ikainra jakiribi min uva banati iki, jatian jan uva banaabora, ja uva bimi kokoi rarokanti iki.

<sup>6</sup> Wetsa netenra Efraín mai matóbo ikainoax,

jato koirannai sontárobo saí

iti iki: ‘Neri bekanwe, Jerusalén-hain non Ibo

Diossiba bononbokanwe’. Ikira saí ikanti iki”, ikira ikana iki.

<sup>7</sup> Ibonra yoia iki:

“Jacobnin chiní bakebo kopí raroi itan benei

bewakanwe, jabora jatíbi maibotiibi ikábo bebonbires jakon jonibo iki.

Maton rabiai jato ninkámai, neská-kanwe:

Itan yoikanwe: ‘Ja Israel jonibo texeabora, Ibon

jawen jonibo iketian jato jakon-mainoa bia iki’, iki ikanwe.

<sup>8</sup> Ninkakanwe enbira: Norteori mainkonía

jakiribi en jato beti iki,

nato netemeara kikin ochokeabobi en jato tsinkiti iki.

Benchebo, chantobo, ainbo tooyabo itan

baken benayabora jato betan joti iki;

¡Kikin icha jonira bekanti iki!

<sup>9</sup> Ninkakanwe: Oranbetani, itan winibetanira bekanti iki.

- Jene baitai taenkora en jato boti iki,  
mai masenenbires iká bain, tatí itimatonra en jato boti iki.  
Jaskara ikaxa ea israelitabaon papa iki, Efraínra nokon reken bake iki.
- <sup>10</sup> Maibotiibi ikábaon, nokon joi ninkakanwe,  
itan aniparo kexabo ochó inonbi jato yoikanwe:  
‘Ibonra Israelbo jato janbisaa iki, ikaxbira pastornin jawen carnerobo akai keskáakin tsinkixon, jato koiranti iki’, iki ikanwe.
- <sup>11</sup> Ibonra Jacobnin chiní bakebo kopfaxon jato jakiribi bia iki, ja mainmea jato xewinna koshi joniboibakeara jato xabaa iki.
- <sup>12</sup> Jerusalénhain iká mai keyáin beaxa raroi bewakanti iki, jakon jawékibo Ibon jato menia akíra rarokanti iki:  
trigo, uva xeati itan xeni, carnero itan wakabora jato meniti iki.  
Joa banábo onpax tachita ikai keskatira, jatíbitian koshi ikanti iki.
- <sup>13</sup> Xontakobora raroshaman ransakanti iki,  
bake ranonbo betan yosibora jaskáribikanti iki.  
Enra jato jakon shinanmati iki: winikanainbira en jato raromati iki, jaton chexá winobainbiresa en jato raromati iki.
- <sup>14</sup> En amaara sacerdotebaon kikin jakon jawékiatibores pikanti iki, icha jakon jawéki en meniara nokon jonibaon jakon shinankanti iki. Ea, Ibonra onantiakin yoike”, ikira iká iki.
- <sup>15</sup> Ibonra yoia iki:  
“Ramáin iká jonibaonra ninkatai, jakonmabires shinanni winiaira tsoabira iki.
- Raquel riki, jawen bakebo kopíra winiai,  
jawen bakebo moa mawata iketianra,  
masá shinanni tantikashamai”, akin.
- <sup>16</sup> Ikaxbira Ibon yoia iki:  
“Moa winiyamawe, Raquel; min beon moa potayamawe, jaskara iken mia onisara kopía iti iki:  
maton rawíbaon mainkonixa, min bakebo moa beribakanti iki. Ea, Ibonra onantiakin yoike.
- <sup>17</sup> Jakon jawékiain nokótinirra mia manáti iki:  
min bakebora jaton mainko jakiribi bekanti iki.  
Ea, Ibonra onantiakin yoike.
- <sup>18</sup> Efraínhainoa jonibo jakonma tenei joiaira en ninkata iki:  
‘Waka onón keska ikenbira min noa raea iki;  
jakiribi noa miki yoiti imawe, jaskara ikenra mia Ibo, non Dios iki.
- <sup>19</sup> Miibakeaxa noa ochota iki, ikaxbira moa jaskáwetsatima non shinanke;  
noa ochaara non onanke, jaskákinra non kishi timai; ja bakeranontian non ocha akátóninra, noa rabinmai, itan namanbires noa imai.’
- <sup>20</sup> Efraín jonibora nokon noi bakebo iki;  
kikinbiresi ea jaton keenai bakebo riki.  
Jato notsinnax sináxonbira, jato shinankin en jeneyamai; akonkinra en jato noike, akonbireskinra en jato noibai. Ea, Ibonra onantiakin yoike.
- <sup>21</sup> Israel jonibó, ja oinxon onantibo bainko akanwe, jatianra maton jakiribi nokoti atikon iti iki;

mato jan kaa bai kikinakin oin-  
kanwe.

¡Israel jonibó, maton jemankobo  
jakiribi bekanwe!

<sup>22</sup> ¿Jawetian kamanki bake ainbo  
manota keská, mato oken kawan-  
bekonti iki?

Ea, Ibonra, nato neten westíora  
bená jawéki en jonia iki:  
ainbaonra joni benai”.

#### **Jatfbinin bebona Israel ikí kati**

<sup>23</sup> Jatíbi atipana Israelnin Ibo Dios-  
senra yoia iki: “Judáinoa jonibo  
jakonma iti ikenbi jakon ikantiakin en  
imaa, jaton mainko itan jaton jeman-  
kobo jakiribi ikax, neskati yoyo ikanti  
iki: ‘¡Nato jakon manan Ibon jakonha-  
banon, jainra atikeskabiakin jakon akí  
jaa jonibo iti iki!’ ikibo.

<sup>24</sup> Judáinoa jonibo itan jain iká jema-  
meabo, ja waín teetaibo itan jaton  
carnero koiranaibora jain jati iki.

<sup>25</sup> Jaskara ikenra ja paxkinnabo, itan  
moa koshi keyotabo, icha piti itan icha  
xeati en jato meniti iki”.

<sup>26</sup> Jaskataitianbira, oxá jishtenxon  
en oinnabaina iki. Jatian ja namata en  
shinanara iká iki jakonshaman.

<sup>27</sup> Ibonra onantiakin yoia iki: “Ninka-  
kanwe: Icha joni itan icha yoina  
Israelhain itan Judáin en imati nete  
nokóti iki.

<sup>28</sup> Jatianra mexai, poxai, rerai, ras aki  
itan jato jakonma imai, ea iní keskáribii  
jakiribi apakeribai itan banai ea teeti  
iki. Ea, Ibonra onantiakin yoike.

<sup>29</sup> Ja netebaonra jakiribi yoyo ikán-  
tima iki: ‘Papabaon uva pae kokoa  
iketianra, bakebo xeta beyákanai, iki  
ikantima iki’.

<sup>30</sup> Jaweratonki uva pae kokoai jara  
xeta beyáti iki. Westíorabora jaton ocha  
kopibiribi mawáti iki”, ikira iká iki.

<sup>31</sup> Ibonra onantiakin yoia iki: “Ninka-  
kanwe: Ja bená jaskara senenhabe-  
konti joi en ati Israel itan Judá betan  
shinanna netera nokóti iki.

<sup>32</sup> Nato jaskara senenhabe konti joi ati  
en shinanna bená joira, maton reken  
papabo Egiptonkonía en jato pikonon-  
tian iní keská itima iki; jabaonra en ja  
senenhabe konti joi en yoia senenha-  
yamakana iki, ea jaton ibo ikenbi. Ea,  
Ibonra onantiakin yoike.

<sup>33</sup> Ja netebaonra Israel betan en ja  
senenhabe konti joi aká neskara iti iki:  
Nokon eséra jaton jointiain en ati iki,  
itan jaton shinan meranra en wishati  
iki. Ea jaton Dios ikenra, jabo nokon  
jonibo iti iki. Ea, Ibonra onantiakin  
yoike.

<sup>34</sup> Jatianra jato betan raenanaibo, itan  
jaton rarebobo ea onankanon ixon, jato  
axeati yoi yoiananti moa maxkákant-  
tima iki, yosiboyabi bakebaonra, jatí-  
xonbi ea onankanti iki. Jaton jakon-  
mabora moa en jato shinanxontima iki,  
itan jaton ochabora en moa shinanwe-  
tsatima iki. Ea, Ibonra jaskara yoike”.

<sup>35</sup> Ibonra jan neten tenati bari aká iki,  
jan yamé

tenati oxe itan wishtinbo aká,  
aniparo

bechon koshiai, itan xoo ikai aká  
iki,

jawen jane jatíbi atipana Ibonra  
yoia iki:

<sup>36</sup> “Nato nete jan imati esébo en aká  
ikenbi iamaketianra, ja neten  
israelitabo moa  
nokon jonibo itima iki.

Ea, Ibonra onantiakin yoike.

<sup>37</sup> Wetsa netén ja nai toponti iketian,  
itan mai kikin chichó chinixon  
onanti iketianra,

jatíbi jakonma aká kopí  
israelitabo ja neten moa nokonama  
itiakin en jato potakeanke.

Ea, Ibonra onantiakin yoike”,  
akinra aká iki.

<sup>38</sup> Ibonra onantiakin yoia iki: “Ninka-  
kanwe: Wetsa netenra nokon jema jaki-  
ribi moa aká iti iki, Hananel torrenko-  
niax tsitsontiaín iká xepóti kamanra  
iti iki.

<sup>39</sup> Jain kaman senennara iti iki, ponté-kainax Gareb mai matóain kaman nokota, jainoaxa Goóri yoshokaina iti iki.

<sup>40</sup> Jatíbi ja mai teshanpa, jain mawábo miinkanai itan jain chiimapo pota-kanai, itan ja Cedrón wean mananho iká jatíbi mai xabábo, ja bari pikotaiori iká, tsitsontiaín iká Kabayobaon Xepóti ikain kaman, nokonabichobiribi iti aká iti iki, jatíbi jabora jawetianbi poxakana itan ras akana itima iki”.

**Ibon xobonkoxon bichi xeiaín  
iká wishá Barucnin yoyo aka**

**36** <sup>1</sup>Joacim, Josíasnin bake, jawen chosko baritia Judá apo inon-tianra, Ibon Jeremías yoia iki:

<sup>2</sup>“Jain wishati bichi xei biwé, Judáinoá Israel yoii ea ikábo jatíbi jain wishawé, wetsa maibotiibi ikábo yoii ea ikáribi awé, Josías janontianbi yoikin peoxon rama kamanbi en mia yoia bo awé.

<sup>3</sup>Ja Judáinoabaon jatíbi jakonma jawékibo en jatoki raanti onanxonra, jaton jakonma ikábobira jenekanti iki, jatianra jaton jakonmabo itan jaton ochabo en moa jato shinanxontima iki”, ikira iká iki.

<sup>4</sup>Jatianra Neríasnin bake, Baruc Jeremíasen kenaa iki, jatianra jatíbi Ibon yoia bo wishati yoia iki, jatianra bichi xeikan Barucnin wishaa iki, jatíbi Jeremíasen yoia wishaa iki.

<sup>5</sup>Jaskáa pekáora Jeremíasnin jaskara atibo Baruc yoia iki: “Oinwe, xepokana ikaxa Ibo rabiti xobonko ea katikoma iki.

<sup>6</sup>Jaskara iketian, ja wetsa nete ayu-nani ikanaitian kaxon, ja en yoia min wishaa xeikamea yoyo anonxiwe, abá-kanon ja Judáin iká jeman jaa jonibaon, itan ja neno beabaon jatíxonbi ja Ibon joi ninkákin.

<sup>7</sup>Jaskáa akantibetin Ibo yokákin, itan jatíbi jaton jakonmabo jenekin, jan jato ati Ibon bebonbires siná shinanra, jaki rakétibires onsá iki”, ikira iká iki.

<sup>8</sup>Jatíbi ja ati Jeremíasnin yoia Barucnin aká iki: Ibon xobonko kaxonra ja bichi xeikan wishaa Ibon joi jato yoyo axona iki.

<sup>9</sup>Ja Josíasnin bake Joacim, moa pichika baritia Judáin apo iká iketian, jawen iskon oxe itinra, Jerusalénhain jabaon, itan Judáinoax Jerusalénhain beabaon, Ibo bebonxon ayunankanti iki.

<sup>10</sup>Jatianra Baruc, ja jan jikiti bená xepoti iká patax, ja Ibon xobo chicho iká jema ikain kaa iki, jainxonra, ja jan jato wishaxonai Safáman bake Gemarías jain iká chitéainxon, ja bichi xeikan iká Jeremíasnin yoia joibo, jatíbi jonibo jato yoyo axona iki.

**Joni koshibo bebonxon, xei meran  
iká joi Barucnin yoyo aka**

<sup>11</sup>Gemaríasen bake Micaías, ja Safánman babanra, ja xeiaínoa Barucnin Ibon joi yoyo akaitian jatíbi ninkata iki,

<sup>12</sup>jatianra apo jain iká xobonko kaa iki, jaskara winota joi wishaiton chité ikain, jain iká jatíbi joni koshibo tsinkikana: Elisama, jan joi wishai; Delaías, Semaíasen bake; Elnatán, Acbornin bake; Gemarías, Safánman bake; Sedequíás, Hananíasnin bake; jainoax wetsa joni koshiboribi.

<sup>13</sup>Jonibo bebonxon Barucnin ja xeiaín wishaa yoyo akai ninkatara jatíbi joi Micaíasen jato yoia iki.

<sup>14</sup>Jehudí, Netaníassen bake, Seleníasen baba, Cusín baban baken bakera, joni koshibaon Baruc yoiti raana iki, ja jatíbi jonibo bebonxon jato yoyo axona xei jato boxontira iká iki. Jatianra Barucnin xei bixon jato bebon boá iki,

<sup>15</sup>jatianra jabaon westíoranin yoia iki: —Yakáxon ja xeikamea wishá noa yoyo axonwe —akin. Barucninra jato yoyo axona iki,

<sup>16</sup>jatianra ja ninkatatianbi, kikinni raketi yoianani neskákana iki: —Jatíbi nato jawékira ninkánon ixon apo non yoiti iki —ikibo.



<sup>17</sup> Japekáora Baruc yokákana iki: —Noa yoiwe jawe keskáaxonki nato jatfibi min wishaa iki —akin.

<sup>18</sup> Barucninra yoia iki: —Jeremías-senbira jatfibi ea yoia iki, jaskáketianra ja bichi xei tintan en wishaa iki —akin.

<sup>19</sup> Jatianra Baruc yokákana iki: —¡Jeremías betan jonétanwe, jatianra jain mato iká tsonbi onantima iki! —akin.

#### **Apo Joacimman bichi xei wishá menoa**

<sup>20</sup> Kikin joni koshibaonra ja xei wishá, Elisamanin chité meran abainkana iki, jainoaxa jatfibi jaskara ikábo apo yoiu jawen xobonko bokana iki.

<sup>21</sup> Elisamakan chitéainoa ja xei wishá bitira apon Jehudí raana iki, Jehudíkan beketianra, apo bebonxon itan jatfibi ja kateaketana joni koshibo bebonxon yoyo aka iki.

<sup>22</sup> Iskon oxe iketianra, matsitian iti jawen chité meran ikax, chii kete patax apo iká iki.

<sup>23</sup> Jehudíkan moa kimisha iamax chosko namanni joyota wishá yoyo akin keyoketianra, chichikanin xatepakexon apon chii kete tiritainko bepota iki. Jatfibi ja xei wishá keyotai kamanra aká iki.

<sup>24</sup> Apobi, jawen xobon iká jawen yonotibobira ja yoyo akai ninkatax, rakéyamaribinonbi chexakaakanaibobi onantima ikana iki.

<sup>25</sup> Elnatán, Delaías itan Gemarías-senra, ja xei wishá menoyamanon ixon apo yokákin teaa iki, ikaxbira jan jato ninkáxonyamaa iki,

<sup>26</sup> jaskáyamakinra Jerahmeel, ja apon kikin rarebo, Seraías, Azrielnin bake itan Selemías, Abdeelnin bake, jabo jato yoia iki, Jeremías itan jawen secretario Baruc yatanxon nexati. Ikaxbira Ibon jato moa jonea iká iki.

#### **Wetsa bichi xeikan wishati Jeremíasnin yoia**

<sup>27</sup> Jeremíasnin yoia joi Barucnin wishá xei apon menoa pekáora, Jeremíassiba kaxon Ibon yoia iki:

<sup>28</sup> “Wetsa xei bixon jakiribi wishawe, ja reken xeikan min aká iibata joiboribi, ja mia Judáino apon Joacimman menonanhibata.

<sup>29</sup> Itan neskara yoia awé: ‘Neskarara Ibon yoia iki: Ja xeira min menoa iki, Babilonia apon nato mai ras axon jawe jonioma itan jawe yoinaomabi itiaikin akí joai winóyamai iketian, Jeremíassen ja xeiain wishaketianra min notsina iki.

<sup>30</sup> Jaskara ikenra, ea, Ibo ixon mia yoiai, mia Joacim, Judáino apon chiní bakera, Davidkan ani yakátinin iti yamake. Mia mawáketianra min yora neten xanan ati iki, itan yaméra kikinakin matsin ati iki,

<sup>31</sup> jatianra mia itan min chiní bakebo, akai keskáribiakin, min xobon iká min yonotibo, jaton ocha kopi en jato masá tenemati iki. Jerusalénhain jaabo, itan Judáin jaa jonibokira jan mato ati en yoia, jatfibi jakonma jawékibo en matoki paketi iki, jabora maton ikonhayamaa iki”.

<sup>32</sup> Jatianra Jeremíassen wetsa xei biribaxon Baruc menia iki, jatian janra jatfibi ja Jeremíassen yoiai joibo wishaa iki, ja joibora iká iki ja apo Joacimman moa menoibata xei meran ikábo. Wetsa jaskara icha joiribira Jeremíasnin tekikin yoia iki.

#### **Apo Sedequíasnin jaki oranti Jeremías yokata**

**37** <sup>1</sup> Ja Nabucodonosor, Babilonia apo ixonra, Josíasnin bake Sedequías Judá apo imaa iki, ja Joacimman bake Jeconiasnin toan.

<sup>2</sup> Ikaxbira Sedequíasninbi, jawen joni koshibaonbi, jainoax ja jonibaonbi profeta Jeremías meranxon Ibon jato yoia joi ikonhayamai yoitimakana iki.

<sup>3</sup> Apo Sedequíasninra, Selemíasnin bake Jucal betan sacerdote Sofonías, ja Maaseíasnin bake, profeta Jeremíassiba jato raana iki, kaxon neskara yoiti: “Non Ibo Dios noa kopi yokáwe”, akin ati.

<sup>4</sup> Jeremíassa yatanxon xepokanama-pari ikáx, jonibo xaran jakonbires niti atipana iki.

<sup>5</sup> Jaskati iikanaitianra, faraónman sontárobo Egiptonkonias bekanai ninkatax, Babiloniobo, Jerusalén binoxon kateax iitibi moa jainoax bokana iki.

<sup>6</sup> Jatianra profeta Jeremíassiba kaxon jaskara yoiti Ibon yoia iki,

<sup>7</sup> Ja Judá apon raanabo jawen joi yoitira iká iki: “Jabaon ea yokánon ixon ja Judáino apon raanabaon, ja faraónman icha sontárobo mato akinni beaibora moa Egiptonko jakiribi bokane, akin jato ati.

<sup>8</sup> Babiloniobora Jerusalén jema ramiaki beribakanti iki, bexonra bikanti iki, jaskáaxonra menokanti iki.

<sup>9</sup> Ea Ibonra, onannon ixon mato yoiai: Matonbinix paranmeeyamakanwe, ja babiloniobora moa boai ixon ikonhayamakanwe, jaskarama riki boyamakaranai.

<sup>10</sup> Jan mato akai icha babilonio sontárobo matonharesabira, jawetishoko joni moa isinhametabo jaton peotain banékanti iki, itan ja jonibo benxoax weníxonra ja jema menokanti iki”.

#### **Joni koshibaon Jeremías xepoa**

<sup>11</sup> Faraónman sontárobo beai ninkatax, babilonio sontárobo moa Jerusalénhainoax bokana iki,

<sup>12</sup> Benjamín jonibaon main kaaira ja jemameax Jeremías pikota iki, jawen papan jawéki biira kaa iki, jawen mainmea jaweti jonibo betan bitira iká iki.

<sup>13</sup> Ikaxbi ja Benjamín mainko kaai pikóti xepotaiin nokóketianra, westíora joni jawen jane Irías, Selemíassen bake, Hananíassen baban, jato koiranaibaon koshi ixon Jeremías bechitexon yoia iki: —¿Miara jabatax babiloniabaona ikí kakasi iki! —akin aká iki.

<sup>14</sup> Jeremíassenra yoia iki: —¿Jara ikonma iki, eara babilonioboiba kayamai! —akin. Ikaxbira Iríasnin ikonhayamaa iki, jaskákinra yatanxon joni koshibo bebon boa iki.

<sup>15</sup> Jabora Jeremíaski kikinbiresi sinákana iki, jaskákinra rishkixon, jaskara iká joibo wishai, Jonatánman xobonko xepoti jato yoii kaa iki, joni koshibaonra jain jato xepoti xobonko jikimakana iká iki.

<sup>16</sup> Jeremíassa jain jato xepokanainko mai meran akana, basibires jain iká iki.

<sup>17</sup> Ja basibires iká pekáora, apo Sedequíasnín jawen xobonko Jeremías boti jato yoia iki, Jeremías apo bebon bokanketianra, jan jonéshoko yokata iki: —¿Ibon ja yoiai joiki ja? —akin. Jeremíassenra yoia iki: Jarake, jara neskara iki: —Miara Babilonia apon yatannai —akin.

<sup>18</sup> Jatianribira, Jeremíassen apo Sedequías yokata iki: —¿Mia itan min joni koshibo iamax joniboki jakonmakín en aká iki, ja esé senenhayamakin, jatian maton ea xepoa iki?

<sup>19</sup> ¿Ja Babilonia apora mato binoxon mato akí itan maton mai bii jawekeskataxbi joyamai ixon yoia profetaboki jawerano ikanai?

<sup>20</sup> Mia nokon apó rama ninkáwe, jaskáaxon nato en mia yokatai ea axonwe: Jonatánman xobonko jakiribi ea jato bomayamawe, jainoaxa ea mawánake —akin.

<sup>21</sup> Jatianra apo Sedequíasnín jato yoia iki, jain xepokaati jemanbi Jeremías imati, jainxon ja callen marokanai pan netetiibi pimakanti. Ja jeman pan japariketianra jaskara akana iki. Jaskatax jain sontárobo ikai jemashokonkobi Jeremías baneta iki.

#### **Jain onpax ati jeneoma ikain joni koshibaon Jeremías potaa**

**38** <sup>1</sup> Wetsa netera, ninkákanon ixon jonibo bebonxon Jeremíassen joibo yoia iki, jatianra ja Matánman bake Sefatías, Pasurnin bake Gedalfías, Selemíassen bake Jucal, itan Malquíassen bake Pasur, jatixon ninkata iki, neskati yoyo ikaitian:

<sup>2</sup> “Ibonra yoiai: ‘Ja jemanbi banetabora reteanantiainoax, iamax pitin,

iamax jakonmabires isinman mawáti iki. Jaskáyamai jainoax pikotax babilonioboki menikaataiboresa, mawákan-tima iki', ixon.

<sup>3</sup>Ibonra yoiboresai: 'Nato jemara Babilonia apon sontárobaon biti iki. Ja akaitianra tsonbi jato bechitetima iki', ixon", akin jato aká iki.

<sup>4</sup>Jatianra jawen joni koshibaon apo yoia iki: —Nato joni reteti riki, jan joi yoiatonra, nato jeman banéparia sontarobo, itan jatíbi jonibora, jato shinan namanharesai, itan jatíbi joni jato rakéai. Nato joninra jonibo jakonhati benayamai, jato jakonmatiresa benai —akin.

<sup>5</sup>Apo Sedequíasenra jato yoia iki: Ninkakanwe: —Jakon riki, maton keena keská já betan akanwe. Enra mato bechiteyamai —akin.

<sup>6</sup>Jatianra Jeremías yatanxon, ja apon bake Malquíasen jain onpax ati meran potakana iki, ja iká iki ja sontárobaon xobo jemanshoko iká. Risbikan axonra apakekana iki, ja jain onpax atira jeneoma ikax chawábicho iketian, Jeremías jain nenita iki.

<sup>7</sup>Westíora etiopeainoa joni jawen jane Ébed-mélec, apon xobonkonía ikoni jaki koshia jawen joninra, Jeremías jain onpax ati meran potakana yoikanai



*Mai kini meran Jeremías potakana.*

ninkata iki. Ja inontianra, Benjamín jema Xepótiaín jato betan apo tsinkita iká iki.

<sup>8</sup> Jatianra ja apo iká xobonkoníax pikókaini Ébed-mélec apo neskara keshani kaa iki:

<sup>9</sup> —Mia nokon apó, ja jonibora jaskáakin Jeremías akáx eséki ramíkanke. Jain onpax ati meran potakanara, moa jainoax pitin mawatai, nato jeman ja jawékiati moa yamaketian.

<sup>10</sup> Jatianbira Ébed-mélecnin kimisha chonka joni boti apon yoia iki, mawatatianbi jain onpax ati meranoa Jeremías tsekai katira iká iki —akin.

<sup>11</sup> Ebed-mélecninra jonibo boa iki, apon xobonko jain chopá benxoakanainkora kaa iki, jainoara jaweti chopá payo bixon, risbikan nexaxon, jain onpax ati meran Jeremías raanxonkana iki,

<sup>12</sup> jaskáaxonra yoia iki: —Mia risbikan bishkoyamanon ixon ja chopá payo min baxká naman awé. Jeremíasninra jaskáa iki.

<sup>13</sup> Jatianra jaki risbí raanxon jonibaon ninixon jainoara tsekakana iki. Ja akana pekáora Jeremías ja sontárobaon jema-shokonkobi baneta iki —akin.

#### **Sedequíasnín Jeremías kenamaa**

<sup>14</sup> Apo Sedequíasnínra jabeon profeta Jeremías bokanti jato yoia iki, Ibo rabiti xobo jawen kimisha iti xepótiaínra iká iki. Jainxonra apon yoia iki: —En mia westíora yoká abanon, pontéres min yoitinínra ea keenai —akin.

<sup>15</sup> Jeremíasenra yoia iki: —Ja min yokata en mia yoiketianra, min ea jato retemati iki; en mia eseara, min ea ninkáxontima iki —akin.

<sup>16</sup> Ikaxbira apo Sedequíassen jonéshoko ja senenhati joi Jeremías yoia iki: —Jan noa jati nete menia Ibon janenkora en mia yoiai, enra mia jato retemayamai, jan mia retekasaiboribira en mia jato meniyamai —akin.

<sup>17</sup> Jatianra Jeremíasen Sedequías yoia iki: —Jatíbi atipana Israelnín Ibo

Diossenra, yoia iki: ‘Moa Babilonia apon sontárobaon koshiboiba kaax, miaareskana shinanmeetax min kikin rarebobbyabi mawáyamai mia mawátima iki, jatianribira nato jema menokantima iki.

<sup>18</sup> Ikaxbi mia jatoki menikaayamaketianra, babiloniobaon nato jema iboaxon menokanti iki, jatianra mia kenekatima iki’ —akin.

<sup>19</sup> Sedequíassenra yoia iki: —Babiloniobo betan ikí kaa judiobokira ea raketai; jabaon bixonra ea isinhakanti iki —akin.

<sup>20</sup> Jatianra Jeremíasnin yoia iki: —Ikaxbi miara jabaon, mia yatantima iki. Ibon yoia joi en mia yoia iketian yoiti iwé, jatian mia jakonbires iti iki, itan mawáyamai mia jati iki.

<sup>21</sup> Mia, jato iboamatinin keenyamai jenéyamaitianra jaskara mia iti Ibon ea oinmake:

<sup>22</sup> Jatíbi ja Judáinoara apon xobon baneta ainbobora, jainoara pikoxon Babilonia sontárobaon koshibo menikanti iki, jatianra ja ainbobaonbi yoiti iki:

Ninkakanwe: ‘Ja apo jakon jabé raenanaibaonbira paranxon jaareskanke; manon nakónon ixonra oinreskanke, jaskaaxonra já pekaoriakana iki’ —akin.

<sup>23</sup> Jatianra Jeremíasen ja apo yoiboresa iki: —Jatíbi ainbobo itan min bakebora babiloniobo menikanti iki, jatianra mia jatoibakeax jabátima iki, ja menikanara Babilonia apona mia iti iki, itan nato jema menokanti iki —akin.

<sup>24</sup> Jatianra Sedequíasnín Jeremías yoia iki: —Mawákashamakin, nato jawéki tsobébi yoiamawe.

<sup>25</sup> Ea mibé yoyo ika ninkataxa, joni koshibo mia yokati bexon, jaweki min ea yoia, itan jaweki en mia yoia ixonribi mia yokákanti iki, mia non reteyamanon jatíbi noa yoiwe akinra mia akanti iki.

<sup>26</sup> Ikaxbi jain mawánaketian jakiribi Jonatánman xobonko en raantimara, ea

yokáke akinresa min jato yoiti iki, ikira apo iká iki —akin.

<sup>27</sup>Jaskara ikenra, jatíbi joni koshibo, Jeremías betan yoyo iki boxon yokákana iki, ikaxbira jaskara yoiti apon yoia keskáshamanribi jan jato yoia iki.

Jaskara ikenra moa teayamakana iki, jaskati yoyo ikaitian tsonbi ninkatama ixon.

<sup>28</sup>Jatianra sontárobaon xobo jeman-shokobi Jeremías baneta iki, ja babiloniobaon Jerusalén biai kaman.